

ՀՏԴ 891.981-1 Սկրտումյան  
ԳՄԴ 84Հ-5  
Մ 807

Մ 807                      Սկրտումյան Նարինե  
Երկեր: Էլեկտրոնային տարբերակ/Ն.  
Սկրտումյան.-Եր.: Հեղ. հրատ., 2014.- 160 էջ:

*Սույն ժողովածուում մեկտեղված են Նարինե Սկրտումյանի չափածո ստեղծագործությունները՝ հելլենական լեզենդները, եգոպոսյան առակներն ու լեզենդները, խոհախրատական քառյակները և ուսուցողական հետաքրքրաշարժ հանելուկները:*

*Գիրքը կազմված է գրողի նախընտրած սկզբունքով:*

ՀՏԴ 891.981-1 Սկրտումյան  
ԳՄԴ 84Հ-5

# ՆԱՐԻՆԵ ՄԿՐՏՈՒՄՅԱՆ



ԵՐԵՎԱՆ

ՀԵՂԻՆԱԿԱՅԻՆ ՀՐԱՏԱՐԱԿՈՒԹՅՈՒՆ

2014



# Հեղինակի ստեղծագործական ուղին

Նարինե Սերյոժայի Մկրտումյանը ծնվել է 1975 թ. մարտի 30-ին, ք. Երևանում: 1991 թ. ավարտել է Դ. Դեմիրճյանի անվան թիվ 27 դպրոցը: 1991-1996 թթ. ուսանել է Երևանի պետական համալսարանի բանասիրական ֆակուլտետում: 1996-1998 թթ. աշխատել է դպրոցում՝ որպես հայոց լեզվի և գրականության ուսուցչուհի, այնուհետև զբաղվել է լրագրողական գործունեությամբ՝ աշխատակցելով մի շարք թերթերի ու ամսագրերի:

2008 թվականին լույս է տեսել նրա անդրանիկ գիրքը՝ «Որտեղի՞ց ենք գալիս, ուրքե՞ր ենք, ո՞ւր ենք գնում» խոհափիլիսոփայական երկը: «Ամեն մի գիտության բանային հարցական նշանն է», - ասել է Բալզակը: Գրքի վերնագիրը պատահական չէ ընտրված, քանի որ դեպի աստվածային գիտությունը տանող կատարելության ուղին սկսվում է հենց այս հիմնահարցերի ուսումնասիրությունից, հարցեր, որոնց պատասխանները փնտրելով ու գտնելով՝ մարդն ի վերջո հանգում է հավերժության գաղափարին, հասնում է ինքնաճանաչման և Աստծո ճանաչման, ձեռք է բերում տիեզերական մտածողություն, գերգիտակցական մակարդակ:

Հեղինակը, հիմնվելով աշխարհի հնագույն կրոնների և հեղինակավոր սուրբ գրքերի վրա, արտահայտել է իր իմաստասիրական մտորումները կյանքի ու մահվան, հոգու և մարմնի, հավիտենականի և անցողիկի, մեղքի, ճակատագրի, կամքի ազատության, ինչպես նաև մի շարք այլ հարցերի վերաբերյալ, անդրադարձել է համամարդ-

կային ու համատիեզերական կարևորագույն գաղափարների, որոնք իրենց ընդգրկունությամբ և մշտնջենականությամբ հաստում են ժամանակի ու տարածության անձիր օվկիանոսը՝ ներթափանցելով վերերկրային խորախորհուրդ առեղծվածների մեջ:

Սակայն լուկ այսքանը թերևս բավարար չէր տարիների ընթացքում պրպտուն հոգում ամբարված խոհածին խորհրդածություններն ընթերցասերների հետ կիսելու համար: Դրանք վերստին պետք է տային իրենց հասուն պտուղները, այս անգամ արդեն չափածո ստեղծագործությունների՝ քառյակների տեսքով...

2009-2010 թթ. համահեղինակային հրատարակությամբ լույս է տեսել «Բնության դեղատուն» քառահատոր մատենաշարը, որում տեղ են գտել տարբեր ժողովուրդների բժշկարանների կողմից առաջարկվող լավագույն դեղատոմսերը, «Գիտունի՞կ ես, թե՞ անգետիկ» ժամանցային խաղազիրքը միջին տարիքի դպրոցականների համար, «Առակներ և լեզենդներ» գիրքը, որտեղ գետեղված են եզոպոսյան առակների՝ հեղինակի կողմից մշակված ու չափածո դարձված տարբերակները, որոնցում պարսավանքի են ենթարկվել մարդկային արատները՝ հպարտությունը, մեծամտությունը, սնապարծությունը, ազահությունը, երախտամոռությունը, խորամանկությունը, սգիտությունը, կեղծավորությունը, նախանձը...

2012 թվականին ընթերցասերներին են ներկայացվել վերոհիշյալ տպագիր գրքերի էլեկտրոնային 3D ձևաչափերը: Նույն տարում այդ շարքը համալրվել է հետաքրքրաշարժ ուսուցողական հանելուկներով:

Նույն թվականին յոթ բեղմնավոր օրերի ընթացքում, ասես մեկ շնչով, ծնունդ են առել Նարինե Մկրտումյանի

խոհախրատական քառյակները՝ բանաստեղծական արվեստի յուրօրինակ փոքրիկ քերթվածքները: Թեև դրանցում տարբեր թեմաներ են շոշափվում, այնուամենայնիվ բոլորն էլ անտեսանելի ներքին թելերով շաղկապված են, միահյուսված այնպես, ինչպես ծաղկաշղթայի ամեն մի ծաղիկը՝ յուրաքանչյուրն իրեն բնորոշ բույրով ու թույրով: Թվում է՝ ամեն ինչ արդեն ասված է, և Թումանյանի՝ գոհարի պես հղկված խոհակերտ քառյակներից, Արևելքի մեծագույն իմաստուններ Օմար Խայամի, Խաքանիի, Հաֆիզի փայլուն և բովանդակալից ռուբայիներից հետո ուրիշ ոչ ոք չի կարող այլևս ներդրում ունենալ պոեզիայի այս ժանրում: Այնուհանդերձ յուրաքանչյուր գոյ-արարած, ով անցել է խոչընդոտներով ու վայրիվերումներով լի տառապալից ուղի, որոնել ու գտել լինելության իմաստը, ամեն մի երկրավոր, ով վաղանցուկ սին փառքի, դափնիների ու նյութական ձեռքբերումների փոխարեն կարևորում է հարամնա հոգևոր արժեքներն ու գանձերը, հարկավ, իր ուրույն ասելիքը կունենա սույն ասպարեզում:

2013 թ. էլեկտրոնային գրքերի շարքը համալրել է «Հելլենական լեգենդներ» ժողովածուն: Հին Հունաստանի լեգենդներն ու առասպելները՝ համամարդկային մշտնջենական այս գանձերը, որոնք առ այսօր պահպանել են իրենց արդիականությունն ու գեղարվեստական բարձր արժեքը, մշտապես ներշնչանքի աղբյուր են հանդիսացել անվանի գրողների, նկարիչների, քանդակագործների համար, ովքեր ոգեշնչվելով երկնել են բարձրարվեստ ստեղծագործություններ:

Ինչ վերաբերում է սույն ժողովածուին, ապա այստեղ մեկտեղված են անտիկ դիցաբանության լավագույն նմուշներից յոթը՝ կերպարանափոխությունը պատկերող, գե-

դարվեստական մշակման ենթարկված չափաճո հատ-  
ընտիր գրույցներ, որոնց շնորհիվ ընթերցողը մտովին  
կտեղափոխվի գեղատեսիլ Հելլադա՝ օլիմպոսյան աստ-  
վածների և քաջարի դյուցազունների հայրենիք, ներկա  
կլինի հերոսների հաղթանակներին ու պարտություննե-  
րին, նրանց հետ ականա կհուզվի ու կտխրի, կոզնորվի  
ու կհրճվի:

Լեգենդների կերպարներն են դափնեճառ դարձած  
հավերժահարս Դափնեն, ինքնասիրահարված ու այլա-  
կերպված Նարցիսը, մահացող և վերստին հարություն  
առնող Ադոնիսը, եղջերուի կերպարանք առած Ակտեո-  
նը, սարդ-աղջիկը՝ Արաքնեն, եղեգի վերափոխված Մի-  
րինգսը, հելիոսորդին՝ անխոհեմ Ֆաետոնը... Իսկ նրանց  
կողքին մեկ առ մեկ կերպավորվում են վեհանձնական,  
փառահեղ, հուժկու, բայց միևնույն ժամանակ՝ երկրա-  
վորին բնորոշ թուլություններով, երբեմն էլ՝ փոթորկա-  
հույզ զգացմունքներով լի հելլենական դիքերն ու դի-  
ցուհիները՝ շանթառաք Ջևս-Դիոսը, նրա գեղանի դուստ-  
րը՝ կորովաձիգ որսորդուհի Արտեմիսը, մահկանացու-  
ների և աստվածների սրտերը սիրո ոսկյա նետերով խո-  
ցող չարաճճի պատանին՝ ոսկեթևիկ Էրոսը, Դափնեին  
խենթի պես սիրահարված արծաթաղեղ Ապոլլոնը, կա-  
ռափնածին դիցուհին՝ ռազմաշունչ ու խոհուն Աթենաս-  
Պալլասը, սրնգահար այծոտն Պանը՝ մե՛րթ ծիծաղաշարժ,  
մե՛րթ պանական ահ ու սարսափ ներշնչող, որդեկորույս  
հուր-Հելիոսը և, իհարկե, միշտ դեռատի, գեղեցկանազ  
Աֆրոդիտեն՝ ոսկեգիսակ կիպրուհին...

Հարկ է նշել նաև, որ լեգենդներում տեղ են գտել մի  
շարք հեղինակային նորակազմություններ, որոնք առա-  
վել գունեղ են դարձրել ստեղծագործությունների լեզվա-  
ոճական ներկայանակը:



ՀԵՐԵՆԱԿԱՆ  
ԼԵԳԵՆԴՆԵՐ



# Դափնե

*Թե ինչպես հավերժահարս Դափնեն  
ծառ դարձավ...*

*Կա մի լեզենդ հեղինական,  
Որ դարերից վաղնջական  
Բերանացի հասել է մեզ,  
Չի մոռացվել, կորել անտես:  
Ասում են, թե օրերում հին  
Ապոլլոնը՝ Չևսի որդին,  
Լուսածաճանչ, ոսկեզանգուր,  
Բոց-աչքերում ցասում ու հուր,  
Վրեժ լուծեց ժանտ Պիթոնից՝  
Հրեշափոր, դժխեմ ու սիդծ:  
Քաջագունը չարքին հաղթեց.  
Բյուր նետերով դիպուկ գարկեց,  
Անշնչացած փռեց գետնին  
Սարսափազդու նենգ օձի դին:  
Հնչեց պեան դյուցազնական՝  
Յնծուն երգը հերոսական,  
Չոնված պիթյան Ապոլլոնին՝  
Չարագործին կործանողին:*



*Դերոսացին՝ լույսի աստված,  
Խավարի դեմ հաղթանակած,  
Խրոխտապանծ, անհաղթ, անպարտ  
Շուրջն էր զննում հպարտ-հպարտ՝  
Արծաթածույլ գեները ուսին,  
Երբ նկատեց ժիր Էրոսին,*

Ով աղեղն էր լարում փութկոտ,  
Չարածճի ու ծիծաղկոտ,  
Յուր հերթական զոհին գտած,  
Հրճվանքով լի բերանը բաց:  
-Էհե՛յ, փոքրի՛կ, սիրո՛ւ աստված,  
Ինչո՞ւ ես դու այդպես զինված,  
Ինչի՞նչ է պետք զենքը ահեղ՝  
Նետ ու կապարճ, ոսկե աղեղ:  
Նետածի՞՞զ ես դու քեզ կարծում,  
Ուժե՞րդ ես արդեն փորձում,  
Հե՛յ, նորածի՛լ խակ պատանյակ,  
Փա՞ռք ես տենչում, թե՞ մրցանակ:  
Չկա ինձ պես աղեղնածիզ,  
Այս Պիթոնին հապա մտիկ,  
Որ քիչ առաջ սպանեցի,  
Բերանքսիվայր զգետնեցի:  
Իսկ Էրոսը գանգրածամիկ,  
Որ սուրում էր ինչպես քամին,  
Արագոտն ու ոսկեթև,  
Սրաթռիչ, սյուքից թեթև,  
Մարդկանց բաշխում  
Անհագուրդ սեր,  
Հապճեպորեն գերում սրտեր՝  
Ընծայելով երջանկություն,  
Հրայրք-տարփանք,  
Հուրք-ջերմություն,  
Բիրտ խոսքերից հույժ սրտնեղեց,  
Ապողլոնին ձեռաց նեղեց:  
-Կասկած չկա, որ հմուտ ես,  
Բայց իմ նետը կխոցի քեզ,  
Վիշտ կբերի ու տառապանք,

Ոչ թե՛ սիրո անհուն բերկրանք:  
Այսպես ասաց կիթերուհու  
Որդին հերոս՝  
Լուսաժայիտ անգութ Էրոսն,  
Ու թափ տալով շողուն թևերն,  
Անմիջապես սլացավ վեր,  
Վայրկենապես հասավ Պառնաս՝  
Նվիրական ու երկնահաս:  
Նա կապարճից զենքը հանեց,  
Միրահարույց ոսկյա նետը  
Ախոյանի սիրտը խրեց,  
Մեկ այլ նետով՝ սերը մարող,  
Ջրկանքներ և կսկիծ բերող,  
Հեզ Դափնեի սրտին դիպավ՝  
Պատճառելով մորմոք ու ցավ:



Ապուլոնը սիրահարվեց,  
Խեղբը գլխից լրիվ մաղվեց,  
Յնծությունից ելավ երկինք,  
Պատեց նրան սիրառատ կիրք:  
Իր ողջ կյանքում չէր տեսել դեռ  
Այդքան գերող, վճիտ աչքեր,  
Վայելչատես, հեզամարմին,  
Չնաշխարհիկ, նազանի կին,  
Մարմարի պես ճերմակիրան,  
Արմաղաշուրթ դյութիչ բերան,  
Փարթամածամ, գեղազանգուր,  
Խեթ հայացքում՝ կրակ ու հուր:  
Անծանոթին հենց նկատեց,  
Իսկույններ նրան առեց,  
Փախավ Դափնեն լեղապատառ,

Այժմամի պես սուրաց անտառ:  
-Կա'նզ առ, քնքո'ւջ հուրի-փերի,  
Դարձել եմ ես սիրուդ գերիմ,  
Հավերժահա'րս գեղեցկագույն,  
Անխիդ ես դու, անագորույն:  
Մի' ցավեցրու սիրտս լցված,  
Խոյ պատանու նետով խոցված,  
Շանթառաքի զավակն եմ ես,  
Կանգնի'ր մի պահ,  
Նայի'ր ինձ, տե'ս,  
Ապողոնն եմ աստվածագուն,  
Դափնե', կա'նզ առ,  
Ո'ր ես վագում:  
Ճողոպրում ես եղնիկի պես,  
Մի' թե այդքան զազիր եմ ես,  
Որ գարշում ես դու ինձանից,  
Որ ատելով ատում ես ինձ:  
Կուգե'ս` ոսկյա քնարն առնեմ,  
Քեզ գովերգեմ, ներքող երգեմ,  
Կուգե'ս` սիրտս հանեմ-տամ քեզ,  
Բայց մենակ թե ինձ չմերժես:  
Վար կբերեմ երկնից աստղեր,  
Կնվիրեմ անմոռաց սեր,  
Կպարզեմ երջանկություն,  
Աստվածային երանություն,  
Միայն, հոգի'ս, իմը լինես,  
Միայն թե դու կինս լինես...



Դափնեն շտապ, շնչակտուր  
Սլանում էր արշավասույր,  
Հետևում էր նրան ահեղ

Ապոլլոնը արծաթադեղ,  
Ցանկանում էր ճեպով բռնել,  
Սիրատարփիկ գիրկը առնել...  
-Հա՛յր իմ Պենևս, օգնի՛ր, փրկի՛ր,  
Քացփի՛ր գետին, ինձ կլանի՛ր,  
Խլի՛ր ինձնից տեսքս չքնաղ,  
Քերում է այն արցունք ու ցավ:



Կույսի խնդիրք-աղաչանքը,  
Հոգուց բխած թախանձանքը  
Տեղնուտեղը իրագործվեց,  
Ողջ սարմինը մեկեն թմրեց,  
Վերափոխվեց, կապեց կեղև,  
Ճոխ վարսերը դարձան տերև,  
Ճյուղ-թևերով երկնակարկառ  
Դափնեն դարձավ գեղանի ծառ:  
Ապոլլոնը՝ խենթ սիրահար,  
Դառնահառաչ ու վշտահար,  
Անհուն ցավից հուսահատված,  
Անպատասխան կրքից վառված՝  
Սիրապապակ փարվեց նրան՝  
Նագուկ ծառին բարակիրան:



-Ա՛խ, Դափնե՛, հոգի՛ս,  
Դու իմ սրտի տեր,  
Ինչո՞ւ թողեցիր  
Լքված ու անտեր,  
Երես թեթեցիր,  
Ինձնից հեռացար,  
Սերս մերժելով՝  
Դափնեծառ դարձար,

Հիմա ո՞նց ապրեմ,  
Ասա', առանց քեզ,  
Հիմա ի՞նչ անեմ,  
Ա՛խ, ի՞նչ անեմ ես...



Առյուծասիրտը,  
Որ ժամեր առաջ  
Հուժկու Պիթոնին  
Հաղթած, սիգապանծ  
Քնար էր ածում,  
Զվարթ թևածում,  
Եղավ լիովին  
Թևաթափ, անգոր,  
Տրտում ու մոլոր,  
Անհույս սիրավոր,  
Ցավից՝ վիրավոր...




-Դեռ լսում եմ տրուփյունը,  
Սրտիդ անդուլ բարախյունը,  
Ա՛խ, ողջ ես դու, ապրի՛ր անմեռ  
Հուր-հավիտյան, հավերժ, հավետ,  
Իմ դիցուհի՛ կանաչավարս,  
Տանջված հոգուս անհա՛ս երազ,  
Փափագում եմ, որ առհավետ  
Լինես ինձ մոտ, լինես ինձ հետ,  
Պսակ կրեմ քո ճյուղերից,  
Բուրումնալից տերևներից,  
Քնարս միշտ գուգես շքեղ  
Պերճանքովդ կանաչագեղ,  
Զթորշոմես, մնաս դու հար

*Քուրումնավետ, մշտադալար:*



*Ասում են, թե այդ օրվանից՝  
Չարաբաստիկ ու դառնալից,  
Արվեստի մեծ հովանավոր,  
Վսեմափառ ու լուսավոր  
Ապոլլոնը տխուր-տրտում,  
Խոր կորստի դարդը սրտում  
Դափնիներ է կրում առմիշտ՝  
Հոգում թախիծ, կսկիծ ու վիշտ:*

*30.10.12.-01.11.12.*



# Նարցիս

*Թե ինչպես ինքնահավան Նարցիսը  
ծաղիկ դարձավ...*

*Գիտե՞ք արդյոք, որ նարգիզը՝  
Սիրունատես, նագանի,  
Դարեր առաջ՝ անչափ վաղուց,  
Եղել է սեզ պատանի:  
Թե ինչու է ծաղիկ դարձել,  
Ջրկվել նարդու կերպարից,  
Դուք կհմանաք՝ ընթերցելով  
Ասք-լեզենդը թախծալից:*



*Պատմում են, որ Հունաստանում  
Հին դիքերի ժամանակ  
Ապրում էր մի գոռոզամիտ,  
Ինքնահավան պատանյակ:  
Բարեկազմ էր, վայելչագեղ,  
Այիք-ալիք ծամերով,  
Պայծառաչվի, ամուր, թիկնեղ,  
Գերված-տարված իրենով:  
-Միակն եմ ես ողջ աշխարհում  
Գեղեցկաշուք, առինքնող,-  
Կրկնում էր Նարցիսն անվերջ՝  
Անձնամեծար, ինքնագով,-  
Չկա ոչ որ ինձ հավասար,  
Իմ վեհ սիրուն արժանի,-  
Բարբառում էր հպարտաբար  
Անբարտավան պարմանին:  
Եվ մերժելով շնորհները*



Աֆրողիտե դիցուիտ՝  
Բնակվում էր մեն ու մենակ,  
Առանց սրտի տիրուիտ:



Վես Նարցիսը շատ էր սիրում  
Թավուտ գնալ, որս անել,  
Համույր որսալ, թռչուն զարկել  
Կամ էլ՝ պարապ թափառել:  
Մի անգամ էլ, թե ոնց եղավ,  
Արահետից խոտորվեց,  
Կանաչահյուս անտառուտում  
Հանկարծակի մոլորվեց:  
Էքոն՝ փերին արձագանքի,  
Միրահարվեց Նարցիսին՝  
Նկատելով պատանյակին՝  
Ինքնահմա, պաղ ու սին:  
Միրափափազ և վախվորած՝  
Թաքնվելով թփուտում,  
Հավերժահարսն այդ ամոթխած  
Ծածուկ նրան էր դիտում:  
-Ո՞վ կա այստեղ,- գոչեց տղան՝  
Լուռ զննելով իր չորս դին:  
-Այստե՛ղ,- թնդաց արձագանքը՝  
Էքոն՝ համրիկ ու լռին:  
-Ո՞վ ես արդյոք, մոտի՛կ արի,-  
Ասաց խրոխտ, կերկերուն:  
-Արի՛,- հնչեց արձագանքը՝  
Երկարաշունչ, զրնգուն...



Վահանակիր Ջևսի կինը՝  
Դժնի Հերան զայրացած՝

Համրացրել էր փերուն ընդմիջտ՝  
Դարձնելով լռակյաց,  
Դրա համար նա պապանձված,  
Համրալեզու, լուռ ու մունջ  
Կրկնում էր վերջին բառը,  
Արձագանքում համրաշունչ:  
Նինֆան կարծեց, թե Նարցիսը  
Իրեն իր գիրկն է կանչում.  
Գոռոզասիրտ արարածին  
Տակավին չէր ճանաչում:  
Քաղցրաժպիտ, բազկատարած  
Դիցանույշը կրակոտ  
Խելակորույս, ինքնամոռաց  
Փութաճենեց նրա մոտ:  
-Մի կո'ղմ քաշվիր,  
Ա'յ անպատկառ,  
Ինձ չդիպչես'ս, գնա ե'տ,  
Լավ է՝ մենենեմ, քան շարունակ  
Լինեն կողքիդ ու քեզ հետ:  
Ամբարիչտը՝ սաստիկ դաժան,  
Կոտրեց սիրտը սիրահար,  
Փախավ էքոն այդ անարժան,  
Բիրտ վարմունքից վշտահար:  
Առ այսօր էլ փերին խոլոր  
Արցունքներ է շաղ տալիս,  
Դառնաթախիժ, վշտամոլոր  
Արձագանքում ու լալիս:



Եվ որոշեց Աֆրոդիտեն՝  
Ծովածնունդ, փրփրածին,  
Մի լավ դաս տալ, հավետ պատժել  
Ինքն իրենով գերվածին,

Որ մերժում է հեգ կույսերի  
Ջուլյալ սերը անաղարտ,  
Վերջ է տալիս իդձ-հույսերին  
Գոռ պահվածքով մեղապարտ,  
Որ չի հարգում, չի մեծարում  
Իրեն՝ շենշող կիպրուհուն,  
Ծաղկափթիթ, գեղեցկանագ,  
Ոսկեգիսակ դիցուհուն:  
Կիպրոսաձինն այնպես արեց,  
Որ Նարցիսը մեկընդմիջտ  
Միրահարվի ինքը իրեն,  
Տեսնի կսկիծ, սուգ ու վիշտ,  
Վավաշալից կրքից այրվի՝  
Միրահառաչ, տրտմամաշ,  
Անպատասխան սիրուց հալվի,  
Քիչ-քիչ լինի հարումաշ:



Գարնան մի օր, երբ Նարցիսը  
Մոտիկ գնաց վտակին,  
Որսից հոգնած և ծարաված՝  
Հագուրդ տալու պապակին,  
Բյուրեղային ջրի միջին  
Չքնաղ էակ նկատեց,  
Հրաշագեղ արարածով  
Ամբողջովին գմայլվեց:  
Գլխի չընկավ, որ շարմաղան  
Երիտասարդն այդ թովիչ  
Ինքն է, որ կա, արտացոլքն իր՝  
Գրավչադեն, հմայիչ:  
Ակնասևեռ նայում էր լուռ  
Ձինջ, ջրեղեն հայելուն,  
Չէր կշտանում ակնահաճո

Յուր-տեսիլքին հայելուց:  
Թևատարած մոտենում էր,  
Ծնկում էր, որ համբույր տա,  
Սիրատոչոր, հրաբորբոք  
Բոց-տենչանքին հագուրդ տա:  
Ցավոք, նրա հուր-շուրթերը  
Դիպչում էին ջրերին,  
Հպարտության հետևանքով  
Դարձել էր նա իր գերին:  
Համակվելով բուռն սիրով՝  
Խելքը գլխից թռցրեց,  
Ուտելիքը մտքից հանեց,  
Քուն ու դադար կորցրեց,  
Մտացնոր ման էր գալիս,  
Կականում էր, կուրծք ծեծում,  
Ինքը իրեն հարց էր տալիս,  
Խորունկ ցավից հեծեծում.  
-Ո՞վ ես, ասա՛, գո՛յ անծանոթ,  
Խարտիշահե՛ր գեղանի,  
Լսո՞ւմ ես ինձ, դե շուտ խոսի՛ր,  
Պատասխա՛ն տուր, ձա՛յն հանի:  
Մի կողմ թողած գոռոզություն՝  
Ընկել եմ քո ետևից,  
Ա՛յ սառնասիրտ, դաժա՛ն, անգո՛րթ,  
Ինչո՞ւ ես զուր մերժում ինձ:  
Ոտով-գլխով հմայել ես,  
Հպարտ սիրտս գողացել,  
Լոկ քո մասին մտածելով՝  
Պարծանքս եմ մոռացել:  
Ե՛լ, դո՛ւրս արի ջրի միջից,  
Էլ խելքահան մի՛ անի,


Ա՛խ, ինչո՞ւ ես ինձ անտեսում,  
Ա՛յ անողորմ պարմանի:



Նարցիսն ընկավ մտքերի մեջ,  
Նորեն նայեց գետակին,  
Յուր պատկերը այնտեղ տեսավ,  
Ողբը կապեց լալագին.  
-Վա՛յ իմ գլխին, մինչև հիմա  
Ինչպես չէի հասկացել՝  
Ինքս ի՛նձ եմ սիրահարվել,  
Ինքս ինձնո՛վ հիացել:  
Երանի՛ թե կարենայի  
Տարանջատվել ու զատվել,  
Երկու անձի վերածվելով՝  
Ճնշող ցավից ազատվել:  
Համոզված եմ, որ շատ շուտով  
Ողջ ուժերս կլքեն,  
Եվ կայցելեմ մութ Հադեսին՝  
Մռայլատես ու դժխեմ,  
Կմահանամ դեռաբողբոջ,  
Հազիվ ծաղկած, կթոշնեմ,  
Արդ զգում եմ մահվան շունչը՝  
Ահասարսուռ, ժանտադեմ:  
Խեղճ Նարցիսը կամաց-կամաց  
Գույնը զցեց, դալկացավ,  
Վերջին անգամ ջրի միջի  
Լույս-պատկերով հիացավ,  
Հյուծվեց, ցնդեց, ինչպես ցողը,  
Որն արեգի շողի հետ  
Անէանում, չքանում է  
Հար-հավիտյան, առհավետ:

Անդ՝ առափնյա խոտի վրա,  
Շեկ գլուխը հեզ կքեց,  
Արտասովաթոր, հուսակտուր  
Մահկանացուն լուռ կնքեց:  
Հեկեկացին նիւֆաները,  
Էբոն նույնպես լաց եղավ,  
Դառնալեղի արցունք թափեց,  
Հոգում՝ լիքը վիշտ ու ցավ:  
Ըղձանույշներն իսկույննեթ  
Դիակի շուրջ խմբվեցին,  
Նրա համար գեղեցկագարդ  
Գողտրիկ շիրիմ սարքեցին,  
Բայց քիչ հետո նկատեցին,  
Որ Նարցիսը վերացել,  
Բուրումնաշատ ու նրբագեղ  
Մահվան ծաղիկ է դարձել,  
Թախծադարուկ ու սիրավեր,  
Դեղնաթերթիկ, գլխիկոր,  
Տառապագին սիրուց տանջված,  
Վշտալլուկ ու վիրավոր:

02.11.12.-04.11.12.



# Սիրինգա

*Թե ինչպես հավերժահարս Սիրինգաը  
եղեգ դարձավ...*

*Հովիտներում ու լեռներում,  
Ծառաստանում կուսական  
Բնակվում էր ահեղ Պանը՝  
Խարդախ Հերմեսի տղան:  
Դիոնիսի՝ գինուց հարբած  
Շքախումբն էր ուղեկցում,  
Այծամարդու՝ ֆավնի տեսքով  
Ճամփորդներին վախեցնում:  
Տիրակալն էր անտառների,  
Հոտի, նախրի պահապան,  
Հովիվների հովանավորն  
Ու սատարը բնության:*



*Հավերժահարս Դրիուպեի  
Հրեշալերպ այծ-որդին  
Ուներ անչափ տարօրինակ,  
Ջարհուրելի արտաքին:  
Այծմորուքով, այծի ոտքով  
Կիսամարդ էր, կիսաայծ,  
Քաղի նման եղջյուրներով  
Արտասովոր արարած:  
Պանը երբ որ աշխարհ եկավ,  
Մայրը տեսից սահմուկեց,  
Սևօրիկ բախտն անիծելով՝  
Այլանդակին շուտ լքեց:*

Հնարագետ գող Հերմեսը  
Իր զավակին գիրկն առավ,  
Սրբազնագույն վես Օլիմպոս՝  
Աստվածների մոտ տարավ,  
Իսկ դիքերը վեհանձնական,  
Ծանրաբարո ու լրջմիտ,  
Հենց որ տեսան ծիծաղաշարժ  
Պան-սատիրին այդ հուպիտ,  
Չդիմացան ու փռթկացին  
Աղմկալից հրճվանքով,  
Հռիռացին, ծանակեցին  
Անգուսպ քրքիջ-ծիծաղով:  
Անհարգալից ժպիրի վարքից  
Խեղկատակը նեղսրտած՝  
Լքեց պայծառ նստավայրը,  
Ճոխ պալատներն ու գնաց,  
Մտավ թավուտ անտառները՝  
Կանաչաբոդ, ծաղկազարդ,  
Փախավ դեպի սեզ սարերը՝  
Բարձրաբերձ ու հարազատ...



Հովվություն էր անում այնտեղ,  
Քաղցրիկ շվին էր փչում,  
Չմայլելի ելևէջով  
Փերիներին մոտ կանչում:  
Նիմֆաները՝ ոգիները  
Աղբյուրների, գետերի,  
Չմրուխտապատ հովիտների  
Ու թավազարդ լեռների,  
Ականջալուր ըմբռչխներով  
Հնչյունները դյուրական,



Գեղադայլայլ, հոգեհմա,  
Մեղրածոր ու մոզական,  
Խմբվում էին շուրջանակի՝  
Աշխուժորեն խայտալով,  
Զվարթացած ու ցնծագին  
Ինքնամոռաց պար գարով:  
Աղմկասեր և այծոտն  
Պանը նրանց հետևում,  
Սատիրների ուղեկցությամբ  
Գոռգոռում էր, թռչկոտում,  
Քաղի նման ցատկոտելով՝  
Խմբապարհին մասնակցում,  
Զվարճանքից ոգևորված՝  
Չայնը գլուխն էր գցում:  
Շուրջբոլորը՝ խիստ-բերկրություն,  
Ողջ բնությունն էր պարում,  
Երբ հրճվում էր այծ-աստվածը,  
Տոն էր ասես անտառում:  
Իսկ տվնջյան հրոտ տապին  
Թաքնվում էր թփուտում  
Կամ զովասուն քարանձավում  
Մրափում էր, քուն մտնում:  
Բայց վա՛յ նրան, ով որ ֆավնի  
Նինջ-անդորրը կխախտեր,  
Ցասումնալից մարդաայծին  
Քաղցր նիրհից կհաներ:  
Չայրագնելով նա կարող էր  
Ծանր երազ առաքել,  
Անակնկալ հայտնվելով՝  
Սարսափելի վախեցնել,  
Պանական ահ առաջացնել

Անցորդների մոտ օտար՝  
Դարձնելով ահաբեկված,  
Վեհերոտ ու դիվահար:  
Անողոր էր ցասման պահին,  
Բայց եթե չէր բարկանում,  
Սիրալիր էր, մեծահոգի,  
Բարիքներ էր միշտ անում...



Թե ոնց եղավ, խենթ էրոսը  
Լարեց աղեղն ու թեթև,  
Գիրք հարվածով Պանի սիրտը  
Խրեց նետը ոսկեթև:  
Եվ վերջինս սիրահարվեց  
Հավերժահարս Սիրինգուին,  
Ով գնում էր որսորդության՝  
Նետամանը մերկ ուսին,  
Նետ-աղեղը ձեռքը բռնած՝  
Որսատեղում պտտվում,  
Չորսողորը լուռ զննելով՝  
Վիթ ու այծքաղ էր փնտրում:  
Շատ նման էր կորովածիզ  
Արտեմիսին հմայիչ,  
Դիցուհու պես կարճափեշ էր,  
Նորատի ու գրավիչ:  
Նրբանագուկ այդ գեղուհին  
Անողորմ էր, անհոգի,  
Վայրագորեն անտեսում էր  
Անրիժ սերը ամենքի,  
Սիրահետող ասպետներին՝  
Հոգատար ու սրտացավ,  
Պատճառում էր անասելի


Ծով-դառնություն, վիշտ ու ցավ:  
Մերժեց նաև այծամարդուն,  
Կոտրեց սիրտը սիրահար,  
Տգեղ տեսքից ահասարսափ,  
Ասլահար և շանթահար  
Սուրաց փերին հողմի նման,  
Վազեց, աչքը ուր կտրեց,  
Նրա առջև հանկարծակի  
Լայնահուն գետ հայտնվեց:  
Արտասովալից դիցանույշը,  
Չեռքերն առաջ պարզելով,  
Դիմեց գետի զորեղ աստծուն՝  
Գութ-փրկություն հայցելով:  
Տերը լսեց աղերսանքը,  
Գեղեցկուհուն աննկուն  
Կարեկցելով սարքեց եղեգ՝  
Բարակամեջք ու ճկուն:  
Իսկ տարփատենչ այծ-սատիրը  
Պազշտ զգվեց եղեգին,  
Փաղաքշելով պիրկ մարմինը՝  
Համբույր տվեց կաթոզին:  
Տխրեց Պանը, տխրեց սաստիկ,  
Որ դիցուհին աղվորիկ  
Լքեց իրեն ու մեկընդմիջտ  
Դարձավ մատղաշ եղեգնիկ:  
Մեղմ սոսափեց թշվառ փերին,  
Հեզանազիկ օրորվեց,  
Թախժեց Պանը, թախժեց սաստիկ,  
Հոնգուր-հոնգուր արտասովեց:  
Մի քանի հատ եղեգ հատեց,  
Մեղրամոմով ազուցեց,

*Ի հիշատակ սեր-Սիրինգսի,  
Սրինգ անունը տվեց:*



*Ասում են, թե այսուհետև  
Մարդաայծը տրտմաշունչ  
Նվագում է այդ գործիքով  
Մեղեդիների քաղցրահունչ:  
Մինչև հիմա չի սնռացել  
Ըղձանույշին սիրասուն,  
Հավերժահարս-եղեգնուհուն՝  
Նագելի ու նրբասուն:*

*08.11.12.-09.11.12.*



# Ակտեոն

*Թե ինչպես Ակտեոնը բարեկազմ  
եղջերու դարձավ...*

*Դրախտային Դելոս կղզում  
Աշխարհ եկան երկվորյակ  
Չքնադադեմ Արտեմիսն  
Ու Ապոլլոնը ցոլարձակ:  
Ամպրոպային շանթ-Դիոսի  
Աղջնակն էր գեղուհին,  
Քաջակորով և անվրեսպ  
Որսորդության դիցուհին:  
Հոգ էր տանում գազանների,  
Մարդկանց համար հողեղեն,  
Կյանք շնորհում ծիլ ու ծաղկին,  
Գորգ-ծածկույթին բուսեղեն,  
Բարենադառն ծնունդները,  
Ամուսնություն, հարսանիք՝  
Ցանկանալով, որ զույգերը  
Կազմեն ամուր ընտանիք:  
Առատագուր Արտեմիսը  
Ծննդկանին սատարում,  
Աստվածային մեծ զորությամբ  
Շատ ախտեր էր դարմանում,  
Գորովալից հոգածությամբ,  
Կարեկցությամբ իր անանց  
Վայելում էր ակնածանքը  
Հելլադայի ողջ կանանց:*



*Հմայիչ էր աստվածուհին,*

Ծաղկահասակ, բարետես,  
Նրա զմբուխտ-աշուկներից՝  
Արծվի նման սրատես,  
Չէր վրիպում ոչ մի ավար՝  
Ո՛չ խազալը երկյուղած,  
Ո՛չ թռչնակը, ո՛չ հովազը,  
Ո՛չ վարազը հերստտած:  
Աղեղնագեն, աշտեն ձեռքին,  
Հանդերձանքով կարճափեշ  
Թաքնվում էր ծառերի մոտ՝  
Սաղարթախիտ, բարձրուղեշ,  
Որսորդուհու փորձառությամբ  
Նշան բռնում, հարվածում,  
Յուր հերթական գոհ-թիրախին  
Անշնչացած ցած գցում:  
Երբ քայլում էր վեհասքանչ  
Դեղսուտիին պանծալի,  
Նիմֆաների ուղեկցությամբ,  
Խինդ-բերկրությամբ ցնծալի,  
Պարուրվում էր շրջակայքը  
Ուրախաձայն գոռոցով,  
Զվարթագին քրքիջներով,  
Բարակների հաչոցով:  
Որսից հոգնած՝ Արտեմիսը  
Շքախմբով, նազենազ  
Այցելում էր աղեղնաձիգ  
Ապոլլոնին ոսկեմազ,  
Ով զարկելով զառ քնարի  
Պերճահնչյուն լարերին՝  
Ախորժալուր մեղեդիով  
Կախարդում էր բոլորին,  
Շնորհաշատ մուսաներին,

Փերիներին պարացնում  
Եվ պաշտելի քույրիկի հետ  
Խմբապարհին մասնակցում:  
Շոգ կեսօրին՝ կիզիչ տապին,  
Աստվածուհին հեռանում,  
Քաշվում էր զով վիմանճավր,  
Պաղ ջրի մեջ լողանում,  
Բայց վա՛յ նրան, եթե մեկը՝  
Մահկանացու արարած,  
Կխաթարեր սուրբ անդորրը  
Կամ կտեսներ մերկացած:



Պատմում են, որ մի երկրավոր՝  
Ակտեռնը պատանի,  
Տեսել է սեզ Արտեմիսին  
Մերկամարմին, հոլանի...  
Երիտասարդն ամռան շոգին  
Ընկերների հետ մեկտեղ  
Կիթերոնի անտառներում  
Փնտրում էր լի որսատեղ:  
Միջօրեին, երբ որ տոթը  
Ահագնացավ, սաստկացավ,  
Պատանյակը որսկաններից  
Հեռանալով խորացավ  
Ու հայտնվեց Գարգափիայի  
Հովտում՝ բուրյան ու ծաղկուն,  
Նվիրված քաջ, արիասիրտ  
Որսորդության դիցուհուն:  
Օլիմպիական լռություն էր  
Իշխում այնտեղ ամենուր,  
Աճում էին եղեմական

Հրաշք-բույսեր թույրիթույր,  
Նետանման կիսյարիսներ՝  
Փշատերև, երկնածիզ,  
Կանաչափայլ եղևնիներ,  
Պերճ սոճիներ սլացիկ,  
Մրտենին էլ մշտադալար,  
Ճերմակագույն ծաղկունքով  
Հագեցնում էր հոգեպարար,  
Արքեցուցիչ բուրմունքով:  
Գեղատեսիլ ու գովաշունչ  
Գետահովտում անապակ  
Խոխոջում էր անուշահունչ,  
Լագուրերանգ ջինջ գետակ,  
Իսկ խորքերում հարթավայրի՝  
Լեռնալանջին գառիվայր,  
Ակտեռնի աչքով ընկավ  
Թավշականաչ խոր քարայր:  
Չարմանք կտրած արարչակերտ  
Հրաշալիք պատկերից՝  
Քաջասիրտը քայլերն ուղղեց  
Դեպի այրը հարակից,  
Հանգստավայրն Արտեմիսի,  
Ուր ոչ մի մարդ-արարած  
Մինչ այդ օրը ոտք չէր դրել  
Եվ չէր տեսել մերկացած  
Գրավչությունն աստվածուհու՝  
Վայելչակազմ, վարդագեղ,  
Նորաբողբոջ կոկոն-կուրծքը,  
Խաս-իրանը փառահեղ:  
Որսկան տղան անձավ մտավ  
Այն անպատեհ վայրկյանին,



Երբ մորեներկ, ազնվաշուք  
Ջևսի դուստրը գեղանի  
Պատրաստվում էր սառը ջրով  
Անուշ լոգանք ընդունել,  
Առույգացած ու թարմացած  
Յուր հանգիստը վայելել:  
Նկատելով անծանոթին՝  
Նիմֆաները ճչացին,  
Բոլորելով Արտեմիսին՝  
Լերկությունը ծածկեցին:  
Վաղորդայնի արևի պես  
Շառագունեց դիցուհին,  
Բոցավառվող հուր-աչքերով  
Ամոթահար պչրուհին  
Է՛լ ավելի սքանչացավ,  
Հողմի նման մոլեգնեց,  
Տարաբախտիկ պատանյակին  
Մի եղջերու դարձրեց:  
Ողջ մարմինը մորթով պատվեց,  
Ականջները սրվեցին,  
Վիզը ձգվեց ու երկարեց,  
Ճյուղ-եղջյուրներ բուսնեցին:  
Այլակերպված արարածը՝  
Բարեկազմ ու վախվորած,  
Գետ-հայելում երբ որ տեսավ  
Կերպարանքը փոփոխված,  
Տրամաթախիժ լացուկոժեց,  
Հանեց հոգոց-թառանջուն,  
Անկարող էր նա այլևս  
Արտաբերել բառ-հնչյուն:  
Որսաշներն արագ ընկան

Եղջերուի ետևից,  
Հալածեցին հեզ կենդանուն  
Կիթերոնի ծերպերից:  
Չառիթափով, մացառներով,  
Ծով-դաշտերով քամու պես  
Սլանում էր Ակտեոնը՝  
Բարակոտն, գեղատես:  
Քերժեները վրա հասան  
Ողորմելի Էակին,  
Ծնկի եկած մարդ-եղջերուն  
Հեծկտում էր տխրագին,  
Աչքերի մեջ՝ վիշտ ու սուկում,  
Ափսոսանք և աղաչանք,  
Կամենալով բարձր գոչել՝  
Հանում էր լոկ հառաչանք:  
Արյունարբու շներն իսկույն  
Ժանիքները խրեցին,  
Խեղճ ու կրակ չորքոտանուն  
Պատառ-պատառ արեցին:  
Այսպես զոհվեց քաջագունը՝  
Շնչավորը երկրային,  
Ով տեսել էր Արտեմիսի  
Մերկությունը երկնային:  
21.11.12.-22.11.12.



# Արաքնե

*Թե ինչպես գոռոզամիտ Արաքնե  
սարդ դարձավ...*

*Կա մի գրույց, որ դեռ հնուց,  
Հին դարերի շնչի հետ,  
Թեաժեղով հասել է մեզ,  
Չի կորնչել առհավետ...  
Լիդիայում հռչակված էր  
Ոսկեձեռիկ Արաքնեն,  
Ով հյուսում էր  
Նուրբ գործվածքներ՝  
Թափանցիկ ու օդեղեն:  
Ամենուրեք հայտնի էր իր  
Բարձրաճաշակ արվեստով,  
Անկրկնելի, հոգեզմայլ,  
Ակնապարար արհեստով:  
Շատ հաճախ էլ նիմֆաները  
Տնորոսի լանջերից,  
Ականակիտ ու ոսկերքեր  
Պակտորոսի փերից  
Խմբվում էին բոլորակի,  
Արարչությամբ զմայլվում,  
Սքանչացած ու ակնապիշ  
Գերեվարվում, հմայվում:  
Ջուլիակուհին, մշուշի պես  
Շուրջը դիզված թելերով,  
Ինքնամոռաց արարում էր  
Ոսկեղենիկ ձեռքերով,  
Երկնում դիպակ-կտորները՝*

Արժաթահյուս, նախշագարդ,  
Անգուգական մետաքսները՝  
Նրբանուրբ ու գունագարդ:  
Հպարտ էր նա, որ այդ գործում՝  
Դժվարագույն, տանջալից,  
Չուներ ոչ մի արժանավոր,  
Գեթ հավասար մրցակից:



Մեծամտեց վարպետուհին  
Եվ մի օր էլ բարձրագոչ  
Մրցման կանչեց Աթենասին,  
Կույսին հղեց մարտակոչ.  
-Ասպարազե՛ն քաջ դիցուհի,  
Արի՛ ինձ հետ մրցելու,  
Չեմ երկնչում ես քեզանից,  
Մե՛կ է, ե՛ս եմ հաղթելու:  
Աստվածահոր գլխից ծնված  
Աթենասը իմաստուն,  
Կապուտաչվի, չքնադագեղ,  
Ազնվափայլ ու խոհուն,  
Ունկն դրեց կոչ-խոսքերին,  
Պառավի տեսք առնելով,  
Ճերմակահեր ու կորամեջք,  
Չեռնափայտին կռթնելով՝  
Ամբարտավան Արաքնեին  
Անմիջապես հայտնվեց  
Ու ծերուհու փորձառությանք  
Խև-անմիտին հորդորեց.  
-Ակա՛նջ արա իմ խորհրդին,  
Մրցակցության մի՛ կանչիր,  
Ծնկի՛ արի, աղո՛թք արա,  
Խոնարհաբար աղաչիր,

Որ դիցուիին պայծառաչյա,  
 Ռազմաշունչ ու զինավառ  
 Ընդմիջտ ների ու մոռանա  
 Արարքների անպատկառ:  
 Քո հմտությամբ դու կարող ես  
 Գերազանցել լոկ մարդկանց,  
 Հաղթանակել սոսկ հողածին  
 Աղջիկներին ու կանանց,  
 Բայց ոչ նրան՝ վես Պալլասին,  
 Որ կույսերին հունական  
 Չեռագործ է ուսուցանում  
 Եվ արհեստներ պատվական:  
 -Հանգի՛ստ թող ինձ, խելա՛ն ջադու,  
 Հորդորների անարժեք  
 Տուր հարսներիդ, աղջիկներիդ՝  
 Ապաշնորհ և անխելք:  
 Ծերությունը գրկել է քեզ  
 Բանական ու կուռ մտքից,  
 Ա՛յ անխոհեմ, քո կարճ խելքով  
 Խրատնե՞ր ես տալիս ինձ:  
 Իսկ որտե՞ղ է Աթենասը,  
 Ինչո՞ւ հետս չի մրցում,  
 Թե վստահ է հաղթությանը,  
 Ինչո՞ւ ուժը չի փորձում:  
 -Այստե՛ղ եմ ես,- խորխտ գոչեց  
 Ձևսի դուստրը հաղթական՝  
 Իսկույններ ընդունելով  
 Կերպարանքը իսկական:  
 Ներկաները գետնատարած  
 Գլուխ տալով ծնկեցին,  
 Կառափնածին գեղեցկուհուն  
 Օվսանաններ ձոնեցին:

Մեզ Արաքնեն անասան էր,  
Հաստատական ու լռին,  
Խիստ հերսոտեց ծավիաչյա  
Անպարտելի ռազմուհին,  
Վարդամատն Էոսի պես՝  
Ծիրանաթույր, ալ-բոսոր,  
Բոցագունեց ողջ երեսը՝  
Չայրութալի ու խոժոռ:  
Վարպետուհին անհողորդ էր.  
Չգիտեր, որ ի վերուստ  
Մոյրաները սահմանել են  
Դժբախտություն ու կորուստ:



Եվ սկսվեց մրցությունը...  
Վեհ դիցուհին գունագեղ  
Մեծ ծածկոցին դրվագում էր  
Ակրոպոլիսը շքեղ,  
Ոսկեթելով պատկերում էր  
Փառահեղ ու համարձակ  
Օլիմպոսյան աստվածներին,  
Ահեղ հորը շանթարձակ,  
Չարդագործում հաղթ դիքերի  
Կերպարները աննկուն,  
Թելահյուսում իր պատկերը՝  
Մաղավարտով շողշողուն,  
Թե ինչպես է երկրասասան  
Պոսեյդոնի հետ վիճում  
Եվ ճոճելով սուր նիզակը՝  
Մայր-հողի մեջ մխրճում:  
Գոռ Արաքնեն յուր կտավում  
Աստվածներին լուսավոր

Ներկայացրեց մահկանացու,  
Ապիկար ու մեղավոր,  
Չառ-ծածկոցի շուրջբոլորը  
Ոստայնանկեց գալարուն  
Բաղեղներով ծաղկապսակ՝  
Երանգածուփ, զարդարուն:  
Անթերի էր աշխատանքը,  
Կատարյալ էր իր տեսքով,  
Ձեռակերտված գլուխգործոց՝  
Շքեղաշուք, ճաշակով:  
Ոչ մի բանով այն չէր զիջում  
Պալլասի պերճ դիպակին՝  
Դրվագազարդ, սքանչագեղ,  
Ոսկեճամուկ քանդակին:  
Սակայն այնտեղ ջուլհակուհին  
Հանել-դրել էր ի ցույց  
Աստվածների հանդեպ եղած  
Ատելությունն անթաքույց:  
Հույժ մոլեգնեց Աթենասը  
Ու փոթորկվեց ողջ հոգով,  
Պատառոտեց խառ-կերպասը,  
Գլխին զարկեց մաքրորով,  
Իսկ սևերես մրցակցուհին  
Պարան հյուսեց, որ կախվի,  
Թել-օղակը վիզը գցի,  
Ամոթանքից ազատվի:  
Բայց Պալլասը վսեմախոհ  
Մահվան ճանկից շուտ փրկեց,  
Անհնազանդ ինքնագոհին  
Հենց նույն պահին անիծեց.  
-Ապրի՛ր այսպես և մշտապես  
Կախված մնա ու գործիր,

Մրանից ետք քո ուժերը  
Հավասարի՛դ հետ փորձիր:  
Այնժամ երբ որ նրան ցողեց  
Բուսահյուրով մոզական,  
Արաքնեի ծամ-հյուսերը  
Տեղնուտեղը վայր ընկան,  
Գիրգ մարմինը մի բուռ դարձավ,  
Կռացավ ու կծկվեց,  
Նենգ մամուկի ձև ստացավ,  
Մարդ-կերպարից նա գրկվեց:



Ասում են, թե սույն օրվանից  
Մարդ-աղջիկը լռելյայն,  
Գլուխը կախ, հմուտ ու վարժ  
Գործում է ցանց-սարդոստայն:  
Չարացած է աշխարհի դեմ  
Ոստայնահյուս Արաքնեն,  
Չի մոռացել հին անեծքը,  
Ներսում՝ անափ ոխ ու քեն,  
Որ փոխել է իր բուն ձևը,  
Գիսակները կորցրել,  
Որ դիցուհին իրեն ընդմիշտ  
Մարդ-մամուկ է դարձրել:  
06.11.12.-07.11.12.





# Աղոնիս

*Թե ինչպես եմ առաջացել ալ  
վարդերն ու ֆնֆուշ հողմածաղիկները...*

*Ծովի թեթև փրփուրներից՝  
Ձյունածերմակ, ցուլաշող,  
Ծնունդ առավ Աֆրոդիտեն՝  
Արփիագեղ ու շենշող:  
Նրբամաշկ էր, ճերմակաթույր,  
Զնքշաքնքուշ՝ խասի պես,  
Վարդ-շուրթերով անուշաբույր,  
Գեղապսակ, վարդերես:  
Ուներ փարթամ, ալիքածև,  
Ոսկեդեղձան գիսակներ,  
Երկնի նման լազուրագեղ,  
Կորաթարթիչ աչուկներ:  
Ազնվատես, բարձրահասակ  
Այս պերճաշուք պճնուհին  
Դեռափթիթ աղջնակ էր՝  
Գեղեցկության դիցուհին:  
Ձահեղության մարմնացումն էր՝  
Հարամնա և անանց,  
Որպես սիրո աստվածուհի՝  
Տղամարդկանց ու կանանց  
Սրտերի մեջ հուր էր ծնում,  
Չզացմունքներ արթնացնում,  
Ամենագոր իշխանությանբ  
Կրքի թակարդն էր գցում:*



*Օրեադներն ու քարիսներն*

Ուղեկցելով մշտապես՝  
Օգնում էին կիթերուհուն՝  
Փառապանծ ու ժպտերես:  
Եթերային և ոսկեհյուս  
Հանդերձներով զարդարում,  
Ալեծածան, խարտիչազեղ  
Վարսերն էին հարդարում՝  
Պսակելով շեկ գլուխը  
Ապարոշով փայլփլուն,  
Պճնագարդում շլացուցիչ  
Ակնեղենով ցուլցուն:



Երբ ճեմում էր Աֆրողիսեն  
Միգալով ու նազանքով,  
Փթթում էին ծաղիկները,  
Օդը լցնում բուրնունքով,  
Հրարփին էր վերից ժպտում,  
Աչքով անում կիպրուհուն,  
Ոսկեճաճանչ բազուկներով  
Հուրքոտ զգվում դիցուհուն:  
Գազանները ծնակներից  
Ելնում էին, մոտ վազում՝  
Նկատելով գեղեցկուհուն՝  
Վարդաժպիտ ու նազուն:



Միրահարույց աստվածուհին՝  
Վսենափայլ, ինքնագոհ,  
Խենթի նման սիրահարվեց  
Ադոնիսին մեծարգո,  
Կիպրոսի քաջ արքայազնին՝  
Հաղթամարմին, առնական,

Մահկանացու արարածի,  
Որ հնայքով մոզական  
Գերազանցում ու հաղթում էր  
Էականերին հողեղեն,  
Մինչև անգամ՝ հելլենական  
Ջոր դիքերին լուսեղեն:  
Հանուն սիրո նա մոռացավ  
Օլիմպոսը լուսառատ,  
Ե՛վ Պատմոսը, և՛ Կիթերան՝  
Ծաղկուն կղզին հարազատ,  
Մի կողմ թողեց պերճ պչրուիու  
Արդուզարդը ակնակուռ,  
Գոհարները, զգեստները՝  
Թանկարժեք ու ոսկեհուռ:  
Ամբողջ օրը անց էր կացնում  
Սիրեցյալի հետ մեկտեղ,  
Թափառում էր անտառներում,  
Փնտրում առատ որսատեղ,  
Այրող տապին արևարարկ,  
Եղանակին ամպամած  
Ջարկում այծքաղ, երկչոտ եղնար,  
Նապաստակներ կամ քարայծ:  
Փախչում էին ծուռթաթ արջից,  
Թրաժանիք վարազից,  
Սահմռկելի առյուծներից,  
Սարսափածին հովազից:  
Աֆրոդիտեն հորդորում էր  
Վտանգներից խուսափել,  
Հանկարծահաս փորձանքներից  
Ամեն գնով ետ կանգնել:



Ադունիսը գնաց որսի,

Ծանոթ վայրից հեռացավ,  
Շների հետ, տեղը ձեռքին  
Թավուտի մեջ խորացավ,  
Միայնակ էր նա այդ օրը՝  
Առանց սրտի տիրուհու,  
Ականջ չարեց խորհուրդներին  
Խորաթափանց դիցուհու:  
Մացառներից հսկայական  
Ժանտ վարազը հարձակվեց,  
Սուրսայր ժանիք ատամները  
Փութով մարմինը խրեց:  
Վիրավորվեց պայազատը,  
Խորունկ վերքից ահավոր  
Առատորեն դուրս էր ժայթքում  
Տաք հեղուկը ալ-բոսոր...



Միրելիի մահվան բոթը  
Աֆրողիտեն հենց լսեց,  
Անասելի անհուն վշտից  
Կարծես խելքը թռցրեց,  
Վազեց դեպի մոտ սարերը՝  
Ոտաբորբիկ, հերարձակ,  
Դեպի անձիր ծառաստանը՝  
Չմրուխտագեղ, լայնարձակ,  
Անցավ խորին անդունդների,  
Մութ կիրճերի եզրերով՝  
Բողրերքյան բոսորաթույր  
Արյան հետքեր թողնելով.  
Տատասկներից, սուր քարերից  
Արնակոլու, վիրալից  
Վազվզում էր աստվածուհին՝

Հուսահատ ու վշտալից...



Վերջ ի վերջո գտավ նրան,  
Անուր փարվեց դիակին,  
Արեց լաց-կոծ, սուգ ու շիվան՝  
Սրտակեղեք, թախծագին:  
Եվ որպեսզի Ադոնիսի  
Հիշատակը մնա վառ,  
Աճեց հեղված ալ հեղուկից  
Հողմածաղիկ արնավառ,  
Իսկ դիցուհու ոտքից հոսած  
Կաթիլ-կաթիլ արյունից  
Կոկոնեցին շքեղ վարդեր՝  
Շառագույն ու բուրալից:  
Աֆրոդիտեն ամեն անգամ  
Հողմածաղիկն նայելով՝  
Հիշում էր յուր սիրեցյալին՝  
Աղեկտուր վայելով,  
Բնությունը ցավակցելով՝  
Թառամում էր և տրտմում,  
Արեգակը մռայլվում էր,  
Ծաղիկները՝ քուն մտնում:



Անպահալած Ջևար գթաց  
Ապերջանիկ դիցուհուն,  
Հրամայեց նեռ Հադեսին,  
Որ արձակի պատանուն,  
Ամեն տարի երկիր թողնի  
Մեռյալների աշխարհից,  
Որ դիմանա ցավ-մորմոքին  
Աֆրոդիտեն տրտմալից:



Ասում են, թե այսուհետև  
Արքայորդին կես տարի  
Բնակվում է Աիդի մոտ՝  
Հարմարվելով խավարին,  
Ստվերի պես թափառում է  
Խորխորատում մթամած,  
Ուր հալածված հոգիները  
Կապում են միշտ սուգ ու լաց:  
Մյուս կեսը անց է կացնում  
Այստեղ՝ երկրի երեսին,  
Իր սիրաթով աստվածուհու՝  
Կիպրուհու հետ միասին:  
Աղոնիսի հարություն հետ  
Ողջ բնությունն է ցնծում,  
Դառնում գունեղ, բուրումնավետ,  
Ասես նորից է ծնվում:  
13.11.12.-14.11.12.



# Ֆատոն

*Թե ինչպես կործանվեց Հելիոսի  
անխոհեմ որդին՝ Ֆատոնը...*

*Հմուտ դարբին Հեփեստոսը՝  
Կաղ աստվածը ամրակուռ,  
Արեգակի համար կռեց  
Ճոխ երկանիվ ոսկեհուռ,  
Որով ամեն արշալույսին,  
Երբ էոսը դիցունիի  
Բաց էր անում դարպասները  
Վարդագունող երկնքի,  
Ոսկեշողիկ հուր-Հելիոսը  
Օվկիանոսի ափերից  
Չիանք լծած ելնում էր վեր,  
Հուրհրատում բարձունքից,  
Տիեզերքին ի ցույց դնում  
Հանդերձանքը ցույցուն,  
Շողակնափայլ թագ-պսակը՝  
Ադամանդով զարդարուն,  
Իր կենսախինդ, ծիրանավառ  
Ճաճանչներով շողողում,  
Կյանք էր տալիս ողջ աշխարհին,  
Լույս-ջերմությամբ ողողում:  
Մայրամուտին իջնում էր ցած՝  
Օվկիանոսը ջրառատ,  
Ոսկեզօծված վառ մակույկով  
Լողում դեպի պերճ պալատ,  
Որ կերտել էր Հեփեստոսը  
Մարուր ոսկուց, արծաթից,*

Հազարերանգ բյուր քարերից՝  
Արևակնից, ալմաստից...  
Արմանք-գարմանք ապարանքում՝  
Ակնախտիտ, երփնավառ,  
Կանգ էր առնում արեգակը՝  
Հոգնությունից ուժասպառ,  
Նիրհ էր մտնում մի աչքը բաց,  
Չլինի թե, մոռանա,  
Անուշ-անուշ քնով ընկնի,  
Այգաբացից ուշանա:  
Բայց մի անգամ գոր Հելիոսը՝  
Դառնակսկիծ, տխրամած,  
Լուսածագին երկինք չելավ,  
Խախտեց կարգը սահմանված...



Թե ոնց եղավ, Էպսիոսը՝  
Չևսի ուստրը մեծամիտ,  
Անվանարկեց արևորդուն՝  
Ֆանտոնին պարզամիտ.  
-Չե՛մ հավատում, որ զավակն ես  
Դյուցազնագարմ արեգի,  
Որդին ես սուկ մի անցավոր  
Ու երկրածին էակի:  
Վիրավորված պատանյակը  
Աղի-լեղի արտասովեց,  
Նետվեց գիրկը Կլիմենեի,  
Նեղսրտելով գանգատվեց.  
-Ո՞վ է հայրս, ասա՛, մայրի՛կ,  
Աղաչում եմ, չխաբես,  
Ասում եմ, թե որդյակը չեմ  
Հրարփիլի ժպտերես:



-Երդվում եմ ես զան Հելիոսով,  
Տղան ես դու արևի,  
Թե ստում եմ, թող որ հայրդ  
Լույսից առնիչտ ինձ գրկի:  
Չե՞ս վստահում իմ խոսքերին,  
Վե՞ր կաց, գնա՛ նրա մոտ,  
Թող հավաստի ասածներս  
Արեգակը կրակոտ:  
Կասկածամիտն անմիջապես  
Գնաց հորը տեսնելու,  
Իր ծագումը հաստատելու,  
Երկմտանքը ցրելու,  
Մտով նրա արքունիքը՝  
Շողակնաշող, ցոլարձակ,  
Գահին բազմած թագակիրը  
Հյուրընկալեց համարձակ  
Ֆատտոնին մահկանացու,  
Ով եկել էր այդքան մոտ  
Պայծառափայլ արեգակին՝  
Բոցակիզող ու հրոտ:  
Բայց և այնպես երկրավորը  
Յուր աչքերով հողեղեն  
Ի գորու չէր դիմակայել  
Հրացուքին լուսեղեն,  
Ուստի արփին մեծահոգի  
Շողապսակը հանեց,  
Շփոթահար Ֆատտոնին  
Հոգածուրյամբ հարցրեց.  
-Այդ ինչո՞ւ ես մոտս եկել,  
Չե՞ս վախենում այրվելուց...  
-Մե՞ծն Հելիոս վսեմաշուք,  
Խնդրո՞ւմ եմ, տո՛ւր ապացույց,

Որ զավակն եմ քո սիրասուն,  
 Աստվածագարն ու անգին,  
 Որ մայրիկս ճիշտ է ասում,  
 Դո՛ւ ես հայրս թանկագին:  
 -Հարկա՛վ, որդի՛ս, իրա՛վ է նա,  
 Ձի դրանում համոզվես,  
 Ինչ որ սիրտդ այժմ ուզի,  
 Ինչեր ցանկաս, կտամ քեզ:  
 Ահավասիկ ուխտ եմ անում  
 Ստիքս գետով սրբազան  
 Վաղվադակի իրագործել  
 Ցանկություններ այլազան...  
 -Դե ուրեմն թո՛ւյլ տուր, հայրի՛կ,  
 Երկանիվդ ես վարեմ,  
 Գոնե մի օր երկինք ելնեմ,  
 Բարձունքներում թափառեմ:  
 -Ա՛յ քեզ խելառ, ցնորամիտ,  
 Ի՞նչ ես ինձնից արդ խնդրում,  
 Խելքդ լրիվ ե՞տ ես տվել,  
 Մի՞թե մահ ես դու փնտրում:  
 Կառք քշելը կատակ բան չէ,  
 Պահանջում է հմտություն,  
 Մինչև անգամ աստվածները  
 Չունեն այնքան զորություն՝  
 Դիմանալու նժույզներիս  
 Բոց-սլացքին հրեղեն,  
 Որ ճիշտ վարեն երկանիվը,  
 Հանկարծ ուղուց չջեղվեն:  
 Երկնակամարն առլեցուն է  
 Սարսափներով, վտանգով,  
 Եթե դույզն-ինչ ես խոտորվեմ,  
 Կհատուցեմ իմ կյանքով՝

Հանդիպելով Կենտավրոսին,  
Ահեղ Յուլին պոզավոր,  
Այծեղջյուրին, հաղթ Առյուծին,  
Սև Կարիճին թունավոր...  
Նախ և առաջ ընթանում են  
Արահետով գառիվեր,  
Խոտորնակ է ճանապարհս,  
Չորս ձիերս անվեհեր  
Դժվարավ են առաջ գնում,  
Չոռով վեր են քարձրանում,  
Մի կերպ քաշում երկանիվը,  
Ուղեծրում շունչ առնում,  
Որ հիմա էլ դարիվայրով  
Ահագնաթափ իջնեն վար,  
Ու թե փոքր-ինչ ծռվեն-շեղվեն,  
Կկործանվեն անպատճառ:  
Քանի շուտ է, հրաժարվի՛ր,  
Որոշումից ե՛տ կանգնիր,  
Փորձությունից հեռո՛ւ մնա,  
Կյանքդ զուր մի՛ վտանգիր,  
Ակա՛նջ արա խորհուրդներիս,  
Չեմ ուզում, որ կործանվես,  
Գերի ընկնես նեճգ Հաղեսին՝  
Մռայլադեմ, դժնատես:  
Աներեր էր Ֆաետոնը,  
Ոչ մի կերպ չէր նահանջում,  
Անտեսելով հորդորները՝  
Երկանիվն էր պահանջում,  
Եվ վասնզի ակն-արևը  
Անխախտ երդում էր տվել,  
Անկարող էր նա այլևս  
Սուրբ խոստումից ետ կանգնել:

Հենց այդ օրն էր եղերական,  
Որ հրարփին տարաբախտ  
Վաղորդայնին երկինք չելավ՝  
Խաթարելով կարգն անխախտ...



Ահա կառքը արեգ-աստծո՝  
Հազարաթույր քարերով,  
Ահա գորեղ նժույզները՝  
Սնված-պահված նեկտարով,  
Մոտ է պահը այգալույսի,  
Ջերմ՝ Հելիոսը խև որդուն  
Վստահում է շող-պսակը,  
Երկանիվը պսպղուն,  
Մտահոգված նրա բախտով՝  
Վերջին խրատն է կարդում,  
Անհանգիստ է զգայուն սիրտը՝  
Մահագուշակ ու տրտում:  
-Լսի՛ր, տղա՛ս, ուշիուշով,  
Պախուրցները կձգես,  
Ուղիղ կանցնես անվահետքով,  
Կոր կամարից շշեղվես,  
Թե մի փոքր շատ բարձրանաս,  
Բիլ երկինքը կխանձես,  
Թե սրընթաց ներքև իջնես,  
Մայր-երկիրը կհնձես:  
Դե՛, շո՛ւտ արա, մի՛ հապաղիր,  
Լուսաբացն է սպասում,  
Եթե միտքդ դեռ չես փոխել,  
Գործեր ունես դու բազում:  
Ֆանտոմը հաստատական,  
Ձիակառքով անվանի

Հանդիսավոր ուղևորվեց  
Դեպ երկինքը ծիրանի,  
Քիչ անց վախով գլխի ընկավ,  
Որ անփորձ է ու անգոր,  
Որ չի կարող սանձահարել  
Նժույզներին թևավոր:  
Փռչմանել էր արեգորդին  
Արարմունքից անհեթեթ,  
Մակայն, ավա՛ղ, էլ չէր կարող  
Վերադառնալ դեպի ետ...  
Սահմնկում էր Ֆատտոնը  
Խոլ ձիերի սլացքից,  
Լեղին ահից ջուր էր կտրում,  
Երբ դիտում էր բարձունքից,  
Իսկ կամարում նրան արդեն  
Սպառնում էր ահավոր  
Մահադեղով լի կարիճը՝  
Հրեշային, նենգավոր:  
Պատանյակը է՛լ ավելի  
Ահարեկվեց, գունատվեց,  
Բաց թողնելով սանձափուկը՝  
Նժույզներին ազատեց:  
Վարգաձիերն օտարոտի  
Կառապանից խրտնած՝  
Մուրում էին օձագալար՝  
Երկնի ծիրը կորցրած,  
Մե՛րթ կատաղի վեր բարձրանում  
Մինչ աստղերը գիսավոր,  
Մե՛րթ շեշտակի ներքև իջնում,  
Կիզում հողը բեղմնավոր:  
Արեգակի քույր Սելենեն՝  
Լուսնի չքնաղ դիցուհին,


Նայում էր իր եղբոր կառքին՝  
Անկառավար, զարտուղի,  
Թե ինչպես է ուղեկորույս  
Տիեզերքը մոխրացնում,  
Բոցալեզու կրակներով  
Հրո ճարակ դարձնում՝  
Հրդեհելով Հելիկոնը,  
Պառնաս լյառը սրբազան,  
Անտառապատ Կիթերոնը,  
Սեզ լեռները Կովկասյան...  
Ամենուրեք ծուխ ու մոխիր,  
Խանձահոտ ու վայնասուն,  
Մխում էին ավանները,  
Այրվում մարդ և անասուն,  
Ողջ ծովերն ու գետակները  
Եռում էին կրակից,  
Մայր-երկիրը ճաք էր տալիս  
Ջերմությունից ու տապից,  
Լույսի շողն էր ներթափանցում  
Աիդի մոտ մթամած,  
Չդիմացավ երկիր- Գեան,  
Չևսին դիմեց ահազնած.  
-Օ՛, գերագո՛ւյն, օգնի՛ր, փրկի՛ր,  
Լեզվակները բոցեղեն  
Կլանում են երկինք, երկիր,  
Քաղաք ու շեն, բուսեղեն...  
Տե՛ս, Առլասը հազիվհազ է  
Երկնակամարը պահում,  
Մի՞թե դարձյալ սպառնում է  
Քառս, խավար, կործանում...  
Քրոնոսածինն ունկն դրեց  
Աստվածուհու խնդրանքին,

Ճեպով նետեց ցոլք-կայծակը,  
Մարեց հրդեհն ու կրկին  
Մեկ այլ շանթով սրաթռիչ  
Կոտրեց կառքը ոսկեղեն,  
Դես-դեն փախան նժույզները՝  
Գեղեցկաբաշ, հրեղեն:  
Յրիվ եկավ երկանիվը,  
Ֆատտոնը հրկիզված՝  
Լուսապայծառ ասուսյի պես  
Սրարշավեց դեպի ցած:  
Ապաքախտը ջուրը ընկավ,  
Նիւֆաները ողբագին  
Էրիդանոս գետի ափին  
Ամփոփեցին նրա դին:  
Իսկ Հելիոսը որդեկորույս  
Ծածկեց դեմքը խոժռված,  
Ամբողջ օրը խռովահույզ՝  
Մութ երկնքում չերևաց:  
Յայսօր էլ դեռ նա մերթընդմերթ  
Սքողվում է ամպերով,  
Դատարկում է լցված սիրտը՝  
Արցունք-անձրև թափելով:  
Խեղճ Կլիմենեն դառնահեծեծ  
Սուգը կապեց տխրալից,  
Հելիադները արևուհի  
Եղան նրան վշտակից:  
Խոր կսկիծից նրանք դարձան  
Երկնասլաց բարդիներ,  
Աղջիկները մինչև օրս  
Արտասպում են թախծաբեր...  
Գլուխները Էրիդանոս  
Գետի ափին հակելով՝

*Իրենց եղբոր մահն են սգում՝  
Խեժ-արտասուք թափելով:  
Մառը ջրում կաթիլները՝  
Թափանցիկ ու դառնագին,  
Վերածվում են դեղին սաթի՝  
Ոսկեփայլ և թանկագին:  
Ֆատտոնի մահից հետո  
Մոտ ընկերը տրտմաշուք  
Տեղնուտեղը դարձավ կարասպ,  
Որ ողբում է սրտմաշուկ:  
Կիկնոս-հավքը ապրում է միշտ  
Լազուրային ջրերում,  
Հոգում լեցուն մորմոք ու վիշտ՝  
Մահվան երգն է գեղգեղում  
Եվ հիշելով հելիոստրդու  
Պատահարը թախծալից՝  
Տագնապահար խույս է տալիս  
Բոցավառվող կրակից:  
24.11.12.-26.11.12.*







ԱՌԱԿՆԵՐ ԵՎ  
ԼԵԳԵՆԴՆԵՐ



## ԲԺԻՂԿ գորտը

Ճահճի միջին՝ հենց կենտրոնում,  
Ճահճաբնակ գորտն էր կենում,  
Թիթեռ, մոծակ, ճանճ էր բռնում,  
Հետն էլ կռռում ու կռկռում  
Եվ ճահճուտի կենկորներին  
Խիստ ձանձրացնում,  
Գլուխ տանում:  
Միապաղաղ, անդուր կյանքից,  
Հոտած վայրից ու տաղտուկից  
Գորտ եղբայրը սաստիկ հոգնեց,  
Կացարանը շուտով լքեց:  
Ուզեց՝ ինքն էլ աշխարհ տեսնի,  
Ցամաք դուրս գա, հեշտ գործ գտնի,  
Հնար անի, փող աշխատի,  
Իր գլուխը այդպես պահի:  
Ճահճից ելավ և որոշեց  
Բժիշկ դառնալ, հիվանդ բուժել:  
Ու մի օր էլ ողջ անտառի  
Գազաններին իր մոտ կանչեց,  
Ի լուր բոլոր ներկաների՝  
Հպարտորեն հայտարարեց.  
-Ես բժիշկ եմ, շատ լավ գիտեմ  
Իմ այս գործը, դա է ինձ միշտ  
Ապացուցել կյանքիս փորձը:  
Թե ունենաք դուք ջերմություն,  
Գրիպ, հարբուխ, մրսածություն,  
Դեղնախտ, խոզուկ, ատամնացավ,  
Փորլուծություն կամ գլխացավ,

Մոտս եկեք, ես կզննեմ,  
Տակից-գլխից ձեզ կքննեմ,  
Դարման կանեմ, կբժշկեմ,  
Ճար կգտնեմ և կփրկեմ:  
Երկարածիզ անմիտ ճառը  
Երբ ավարտեց, ծեր աղվեսը  
Իմաստակի՛ն պախարակեց.  
- Գո՞րտն էլ արդյոք բժիշկ լինի,  
Այդ ամենից, ա՛յ անճոռնի,  
Դու իսկի էլ չես հասկանում  
Կամ այնքան ես գլուխ հանում,  
Որքան էշը՝ անուշ նշից,  
Կամ էլ խոզը՝ պտտածողից:  
Գիտունիկ ես քեզ հռչակել  
Ու գլխներիս հերքիմ դառել,  
Ա՛յ սառնարյուն, ա՛յ ինքնակոչ,  
Մեծաբերա՛ն, հիմա՛ր, անպո՛չ:  
Հայելու մեջ տեսե՞լ ես քեզ,  
Գիտե՞ս, թե ինչ այլանդակն ես,  
Հիվանդոտ ես, դեղնած-մեղնած,  
Աչքերդ էլ բնից ելած  
Եվ դուրս ցցված,  
Լպրծուն ես ու գարշելի,  
Բշտիկապատ, զարիուրելի:  
Քո այս տեսքով շատ նման ես  
Դու հիվանդի: Թե կարող ես,  
Նախ և առաջ քեզ բժշկիր,  
Հետո միայն դու մեզ բուժիր,  
Մահից փրկիր:

09.08.08.

# Պարծենկոտ բզեզը

*Բզեզը աղբը  
Փորեց, փորփրեց,  
Կուշտ ու կուռ կերավ  
Ու մի լավ փրվեց,  
Գլուխը աղբից  
Դանդաղկոտ հանեց,  
Ծույլ հորանջելով  
Ամպերին նայեց:  
Նկատեց հեռվում՝  
Անծիր երկնքում,  
Հզոր արծիվն է  
Սուրում բարձունքում:  
Բզեզ-մզեզը  
Խիստ վիրավորվեց,  
Յուրայիններին  
Նեղսրտած ասեց.  
-Ապա մի նայեք  
Էն արծվի տեսքին,  
Նրա թևերին,  
Սուր-սուր ճանկերին,  
Կեռ կտուցը՝ թուր,  
Մարմինը՝ ամուր,  
Ու ինքն էլ՝ ասես  
Մի թեթև փետուր:  
Երբ ուզում է,  
Մինչ ամպերն է  
Նա սլանում,  
Անձայրածիր*

Հեռուներն է  
Թռչում-գնում:  
Իսկ ե՞ս ինչ եմ.  
Ո՛չ սողուն եմ,  
Ո՛չ թռչուն եմ,  
Բայց չէ՞ որ  
Ե՛ս էլ թռչում եմ:  
Մի՞թե արծվից  
Պակաս եմ ես,  
Ե՛վ թևավոր,  
Ե՛վ սրատես,  
Կուզեմ ես էլ  
Թռչուն դառնալ,  
Հեռուները,  
Բարձունքները  
Թռչել-գնալ:  
Մեծամտեց  
Ինքնահավան  
Բզեզիկը  
Ու բարձրացավ  
Ջինջ երկինքը,  
Իսկ երբ ուզեց  
Լուրթ կամարում  
Արծվին հասնել,  
Կտրել-անցնել,  
Հանկարծ ուժեղ  
Քամի փչեց,  
Պարծենկոտին  
Աղբակույտի  
Մեջը գցեց:  
Բզեզն աղբը

Դարձյալ կերպ  
Ու կշտացավ,  
Թռչուն դառնալն  
Իսկույններ  
Նա մոռացավ:  
**03.08.08.**



# Երջանկությունը

Ասում են՝ մարդը  
Ասածո մոտ գնաց,  
Պատմեց ցավ-դարդը,  
Քախտից տրտնջաց,  
Բողոքեց խղճուկ,  
Անողոք կյանքից,  
Իր տխուր հալից,  
Թշվառ վիճակից:  
Նա այնքան ողբաց,  
Որ Տերը խղճաց,  
Երջանկությունը  
Տակառը լցրեց,  
Քերանը կնքեց  
Ու նրան տվեց:  
Վերջում պատվիրեց,  
Որ ամեն դեպքում,  
Ինչ էլ պատահի,  
Կնքված նվերը  
Ընդմիջտ փակ պահի:  
Մարդը տուն հասավ,  
Էլ չդիմացավ,  
Տիրոջ հորդորը  
Իսկույն մոռացավ,  
Տակառը բացեց,  
Քիթը ներս խցկեց,  
Քայց ափսո՛ս, ավա՛ղ,  
Ոչինչ չգտավ:  
Ահա թե ինչպես

Գոյ-արարածը  
Երջանկությունը  
Ձեռքից բաց թողեց,  
Երկինք թռցրեց:  
Եվ այդ օրվանից  
Կրկին տառապում,  
Փնտրում է նրան  
Ու էլ չի գտնում:  
02.08.08.





# ՋԼԱՆ ՈՒ ԿՐԻԱՆ

Ջևար մի օր խնջույք սարքեց,  
Առատ ու ճոխ սեղան բացեց  
Եվ անտառի կենվորներին  
ճաշկերույթի հրավիրեց:  
Ընդունելով հրավերը՝  
Ներկա էին ողջ հյուրերը,  
Ահեղ Աստծուն մերժել միայն  
Ու չէր եկել ծերուկ կրիան:  
Հյուրընկալը դիմավորեց,  
Ներկաներին սրտանց դիմեց.  
-Դե՛, սիրելի՛ բարեկամներ,  
Եկեք, նստեք, մի՛ ամաչեք,  
Կերակուրներ անուշ արեք,  
Երգեք, պարեք, ուրախացեք:  
Լի ուտեստներ, կարմիր գինի,  
Սրանից լավ ի՞նչ կլինի...  
Առյուծ արքան գինին բացեց,  
Գավաթները մեկ-մեկ լցրեց,  
Շեկ աղվեսը կենաց ասեց,  
Ջևա-Դիոսին փառաբանեց:  
Սոխակն անուշ երգ դալալեց,  
Ծուռթաթ արջը ելավ, պարեց,  
Կապիկն արջի տնագն արեց  
Եվ բոլորին զվարճացրեց:  
Խաղ ու խնդում, ծափ ու ծիծաղ,  
Խնջույքն այսպես ուրախ անցավ:  
Ջևար մի լավ հյուրասիրեց,  
Ինչպես կարգն է, հարգեց,

*Պատվեց ու տուն ճամփեց:  
Կերուխումի հաջորդ օրը  
Իր մոտ կանչեց և հարցրեց  
Ծեր կրիային.  
-Որտե՞ղ էիր,  
Ինչո՞ւ չեկար խրախճանքին:  
Իսկ նա ասաց.  
-Իմ տանն էի, էլ ո՞ր պիտի,  
Չէ՞ որ ամեն մեկն էլ գիտի,  
Որ իր տնից լավ տեղ չկա...  
Այս որ լսեց,  
Շանթարձակը հույժ զայրացավ,  
Համարձակին ցասկոտ ասավ.  
-Սրանից ետք ուր էլ գնաս,  
Տունդ մեջքիդ պիտի ման տաս:  
Ասում են, թե այդ օրվանից  
Կրիան ուր էլ որ գնում է,  
Իր պատյանը շալակում է,  
Հետք տանում,  
Բայց գրահի ծանրությունից  
Շուտ հոգնում է,  
Դանդաղում է և ուշանում:  
09.01.02.*



# Մոծակն ու եզր

Մոծակն եկավ ծանր ու մեծ  
Եզան պոզին հայարտ նստեց,  
Ինչքան տզգաց, տզտզացրեց,  
Եզը բանի տեղ չդրեց,  
Նա իր խոտն էր դանդաղ ծամում  
Ու անտարբեր հեռուն նայում:  
Տզտզանը պարապ-սարապ  
Այնքան նստեց, որ ձանձրությից  
Ինքն էլ հոգնեց: Ոտքի ելավ,  
Որ հեռանա, այլ տեղ գնա,  
Մեկ էլ հանկարծ միտքը փոխեց,  
Նրան ասեց.  
-Ձեռն չես հանում, ա'յ եզ ախպեր,  
Չեղար դու ինձ գրուցընկեր,  
Ի՞նչ ես ասում, թողնեմ-գնա՞մ,  
Թե՞ ուզում ես քիչ էլ մնամ:  
Երբ մոծակի ձայնը լսեց,  
Եզն աչքերը վերև տնկեց,  
Չարմանք կտրած  
Դես-դեն նայեց,  
Բայց փոքրիկին չնշմարեց:  
-Ո՛չ քո գալն եմ ես իմացել  
Ու դրանով ուրախացել,  
Ո՛չ էլ գնալդ կիմանամ,  
Առանց քեզ էլ կդիմանամ:  
Կյանքն է ախպես.  
Մոծակի պես  
Մարդը որքան

Աննշան ու փոքր է լինում,  
Այնքան իրեն  
Նա մեծ բանի տեղ է դնում:  
**06.08.08.**



# Խարդախ փիսուն

Գող փիսիկը մառան մտավ,  
Փորը լցրեց, ինչ որ գտավ,  
Իսկ վախժորած մկնիկները  
Սրտապատառ ճողոպրեցին,  
Թարնվերով մութ խորշերում՝  
Կատվի ճանկից ազատվեցին:  
Բլկիկ փիսուն հապճեպորեն  
Ճկուն խելքին տվեց գոռը,  
Որ մկներին խարդախորեն  
Ծակից հանի, լցնի փորը:  
Չարամիտը մեխից կախվեց,  
Շունչը պահած պատին գամվեց,  
Փայտի նման անշարժացավ  
Ու սուտ սատկած նա ձևացավ:  
Մի հերոս մուկ,  
Իր բնունը ապան կտրած,  
Կատվին ասաց.  
-Հե՛յ, փափկամա՛զ,  
Թեկուզ տեղով  
Տոպրակ դառնաս,  
Պատից կախվես,  
Չես խաբի մեզ:  
03.05.11.



# Կատուն՝ քահանա

*Կատուն տերտեր ձևացավ,*

*Սև սքեմը գողացավ,*

*Երկար մորուք կպցրեց,*

*Խաչը վզից կախ տվեց,*

*Իրար գլուխ ժողովեց*

*Ավանի ողջ մկներին,*

*Իրեն սրբի տեղ դրեց,*

*Հայտարարեց բոլորին.*

*-Այս համայնքի տերտերն եմ,*

*Ձեր փրկիչն ու ձեր Տերն եմ,*

*Մոտս եկեք, մոմ վառեք,*

*Աղոթե՛ք, ապաշխարե՛ք,*

*Որ մկրտեմ, մեղքից փրկեմ,*

*Մահից հետո մեկիկ-մեկիկ*

*Առոք-փառոք դրախտ դրկեմ:*

*Գորշ մկնիկը բայց հո տեսավ,*

*Որ գող փխտն վանքը մտավ,*

*Խաչը կախեց, տերտեր դառավ,*

*Հրեշտակի կերպար առավ:*

*Վախկոտ մուկը համարձակվեց,*

*Ինքնակոչին հանդիմանեց.*

*-Ո՞վ է տեսել կատուն՝ տերտեր,*

*Գա ու կանգնի մեր գլխին տեր:*

*Լավ է՝ առանց կնքվել մեռնենք,*

*Դժոխք ընկնենք, քան մկրտված,*

*Մեղքից փրկված փորդ մտնենք:*

**04.08.08.**

# Ուղտն ու եզր

Սապատավոր ուղտը մի օր  
Գլուխը կախ, մտամոլոր  
Փուշ էր ուտում, մեկ էլ հանկարծ  
Եզր տնկվեց նրա դիմաց:  
Ուղտը երկար նայեց եզին  
Ու նախանձեց սուր-սուր պոզին,  
Ելավ-գնաց Արարչի մոտ,  
Գանգատ արեց խիստ զայրացկոտ.  
- Ինչի՞նչ է պետք ծուռ սապատը,  
Ինչո՞վ եմ ես եզից վատը,  
Ես էլ կուզեմ պոզ ունենամ,  
Կոտոշներով հայարտանամ:  
Երկնավորը հույժ բարկացավ  
Եվ կուզիկին կտրուկ ասավ.  
- Գոհացի՛ր քո ունեցածով,  
Բոյ-բուսաթով, լեռ-սապատով:  
Տերը նրան պոզ չտվեց,  
Դեռ ավելին, որպես պատիժ,  
Ականջներն էլ բռնեց-կտրեց:  
Թող դաս լինի սա ամենքին  
Եվ հասկանան, որ ոչ մեկին  
Չի կարելի ո՛չ նախանձել,  
Ո՛չ էլ աչքը մեկ ուրիշի  
Ունեցածի վրա տնկել:  
30.07.08.



# Աղվեսն ու կռունկը

Ծեր աղվեսը շիւա եփեց  
Եվ կռունկին հրավիրեց.  
Որոշել էր, որ ձեռք առնի,  
Դատարկ փորով նրան ճամփի:  
Ճաշը լցրեց ողորկ քարին  
Ու իր հյուրին տնավարի  
Հյուրասիրեց, մի լավ ծաղրեց:  
Խեղճ թռչունը ինչքան կտցեց,  
Քաղցած փորը բան չգցեց,  
Իսկ շեկլիկը շիւան լափեց,  
Ուռավ-փքվեց, դունչը սրբեց,  
Մի կողմ քաշվեց:  
Քայց կռունկը, արի ու տես,  
Գլխի ընկավ, որ չար աղվեսն  
Իրեն խաբեց, իր տուն կանչեց,  
Այդպես ծաղրեց ու ծիծաղեց,  
Դատարկ փորով,  
Սոված-ծարավ ճանապարհեց...  
Չնայած որ քանի ամիս  
Դեպքից անցավ,  
Կռունկի թունդ բարկությունը  
Չմեղմացավ:  
Երկար-բարակ նա մտածեց,  
Գցեց-բռնեց, թե ինչ անի,  
Թե ոնց անի, որ խարդախին  
Տեղը դնի, ոխը հանի:  
Նա աղվեսին հրավիրեց,  
Երկար ու նեղ կժի միջին



Համով ճաշը լիքը լցրեց,  
Խորամանկի առջև դրեց:  
Շեկլիկն առավ բույրը ճաշի,  
Ուզեց իսկույն փորը քաշի,  
Շրթունքները լավ լսստեց,  
Ախորժակը շատ գրգռվեց,  
Ստամոքսը սովից գռռաց,  
Ու բերանի ջուրը գնաց:  
Կռունկն առանց դժվարության  
Երկարավուն սուր կտուցը  
Կուժը կոխեց, անուշ արեց,  
Իսկ աղվեսը ինչքան էլ որ  
Սափորի շուրջ պտույտ գործեց,  
Ինչքան էլ որ քիթը խոթեց  
Եվ հոտոտեց,  
Փորը ոչինչ նա չլցրեց:  
Փոր ու փոշման, սոված-ծարավ,  
Գլուխը կախ ճամփա ընկավ:  
Այսպիսին է չարի վերջը.  
Ով փոս փորի, կընկնի մեջը:  
**03.08.08.**



# Ագռավն ու աղվեսը

Սև ագռավը պանհիրն առավ,  
Հսկա բարդու ճյուղին թռավ,  
Իսկ աղվեսը, փորը վեց-վեց,  
Ծառի կողքին մեկեն տնկվեց  
Ու միտք արեց, թե ոնց անի՝  
Ուտելիքը տակով անի:  
Քիչ մտածեց, գտավ ելքը  
Եվ սկսեց իր գովերգը.  
-Էս ի՞նչ սիրուն ագռավ ես դու,  
Հրաշագեղ, գեղեցկատես,  
Իմ ողջ կյանքում քեզ պես չքնաղ  
Ոչ մի թռչնակ չեմ տեսել ես:  
Դու՝ տեղովդ հուրի-փերի,  
Հեզիկ-նազիկ, կարմրաթուշ,  
Քաղցրիկ երգդ ինձ կգերի,  
Մատաղ լինեմ ձայնիդ անուշ:  
Ագռա՛վ քույրիկ, շա՛տ եմ խնդրում,  
Մի տաղ ասա, ձայնդ լսեմ,  
Քանի օր է քեզ եմ փնտրում,  
Որ խնդրանքս ես քեզ ասեմ:  
Խորամանկի ասածներին  
Միամիտը ականջ դրեց,  
Կեղծ, սուտումուտ ներբողները  
Հալած յուղի տեղ ընդունեց:  
Իրեն քնքուշ բլբուլ կարծեց,  
Կոկորդով մեկ աղաղակեց,  
Իսկ պանհիրը ներքև ընկավ...  
Աղվեսն ասավ. -Հերի՛ք եղավ,

Կտրի՛ր տիաճ կռկռոցդ  
Ու մի՛ գցիր գոռգոռոցդ,  
Դու տխրակ չես, այլ՝ լոկ ագռավ,  
Կռնչոցդ գլուխ տարավ:  
08.05.11.



# Աղվեսն ու այծը

Փորձված աղվեսը  
Ջրհորը ընկավ,  
Ինչքան էլ տանջվեց,  
Ելքը չգտավ:  
Երկար ժամանակ  
Նստելով հորում՝  
Անճարությունից  
Գլուխն էր քորում,  
Անվերջ մտորում...  
Ու մեկ էլ հանկարծ  
Մի այծ մկկաց:  
Շեկլիկը ցնծաց.  
«Օ՛, կարծես Աստված  
Աղերսս լսեց,  
Ցանցառ մորուքին  
Իմ կողմը դրկեց»:  
Այծը հարցրեց.  
-Հե՛յ, աղվես՝ս քույրիկ,  
Մեն-մենակ նստած  
Էդ ի՞նչ ես անում,  
Ի՞նչ է, դու ջրից  
Հե՛չ չե՞ս կշտանում:  
-Չէ՛, չեմ կշտանում,  
Ինչքան էլ խմում,  
Սառնորակ ջրից  
Ես չեմ հագենում.  
Շատ քաղցրահամ է,  
Օ՛, իսկը շարքաթ,

Երևի էստեղ  
Նստեն մի շարաթ:  
Դու էլ կլինես  
Շոգից ծարաված,  
Դե՛, ինձ մոտ արի,  
Արագ իջիր ցած:  
Պառաված այծը  
Կուլ տվեց խայծը.  
Հենց որ սուտլիկի  
Գովեստը լսեց,  
Խելքը թռցրեց,  
Իջավ ջրհորը,  
Ջուրն ածեց փորը,  
Լիացավ, տռգեց:  
-Բայց, ա՛յ քեզ փորձանք,  
Հիմա ո՞նց դուրս գանք:  
Իսկ աղվեսն էլ՝ թե.  
-Մեջք մեջքի որ տանք,  
Սարեր շուռ կտանք,  
Ես վաղուց գիտեմ  
Ընտիր հնարանք:  
Արի՛, թիկունքդ  
Հենիր էս պատին,  
Որ ոտս դնեմ  
Քո լայն ճակատին,  
Ու ինձ էլ օգնիր՝  
Հորիցը դուրս գամ,  
Հետո էլ ես քեզ  
Օգնության կգամ:  
Խարդախը այս կերպ  
Ջրհորից ելավ,


Կայտառ ու զվարթ  
ճանապարհ ընկալ:  
-Կա՛ց, ա՛յ անհրավ,  
Էդ ո՞ւր ես գնում,  
Դու մեր պայմանը  
Ինչո՞ւ ես խախտում,  
Օգնի՛ր, որ ես էլ  
Էստեղից դուրս գամ:  
Խորամանկն ասաց.  
-Է՛յ դու, անզգա՛ն,  
Ուղեղդ ո՞ւր էր,  
Երբ ներքև իջար,  
Դե՛, հիմա էլ դու  
Արա գլխիդ ճար...  
**04.05.11.**



# Մեծամիտ կանթերը

Մութ էր: Մարդը լամպը վառեց,  
Ողջ խորճիթը լուսավորվեց:  
Լույսը հանկարծ պայծառացավ,  
Իսկ կանթերը գոռոզացավ,  
Ինքն իրենով շատ գնայլվեց,  
Հպարտորեն հայտարարեց.  
-Լույս եմ տալիս բոլորից վառ,  
Չկա ինձնից գորեղ, պայծառ,  
Լուսավոր եմ ես լուսնյակից,  
Առավել եմ արեգակից,  
Լուսատու եմ ես անսպառ,  
Չկա ոչ ոք ինձ հավասար:  
Ե՛ս... Ե՛ս... Ե՛ս... Ե՛ս...  
Մեկ էլ անտես  
Մեղմիկ սյուրքը տարուբերեց  
Ու ճրագի լույսը մարեց:  
Մեծամիտը իսկույննեթ  
Չայնը կտրեց, քիթը կախեց...  
Մարդը կրկին լամպը վառեց,  
Սնապարծին լավ նախատեց.  
-Ո՞վ է տեսել, որ կանթերը  
Իր գովքն անի, գլուխ գովի,  
Արեգակին, լուսնյակին էլ  
Դեռ փնովի:  
Ով լինելը  
Դու երբևէ մի՛ մոռացիր  
Ու խոսքերիդ,

*Ասածներիդ  
Չափն իմացիր:  
04.08.08.*





# Առյուծը, աղվեսն ու էշը

Ծեր առյուծը տկարացավ,  
Մեջքի ցավը շատ սաստկացավ,  
Չեռ ու ոտից ընկավ իսպառ,  
Իսկ աղվեսը գլխասպատառ,  
Շտապ եկավ հիվանդատես...  
-Բարո՛վ եկար, քավո՛ր աղվես:  
-Հագա՛ր բարի, իմ հարգելի,  
Հենց լուրն առա սարսափելի,  
Մոտդ եկա, մի ճար անեմ,  
Քեզ դարմանեմ, ոտքի հանեմ:  
-Թե ուզում ես, որ ողջ մնամ,  
Էն աշխարհը ես չզնամ,  
Ավանակին շուտ մոտս բեր,  
Թե չես ուզում մնալ անտեր:  
Միրտս նրա միսն է ուզում,  
Դա է միակ բուժիչ դեղը,  
Երբ որ էշին փորս քաշեմ,  
Կսպաքինվեմ տեղնուտեղը:  
-Ապրա՛ծ կենաս, հզո՛ր արքա,  
Քեզանից թանկ ոչ որ չկա,  
Ինչ ուզեցիր, ես կճարեմ,  
Թեկուզ կյանքովս վճարեմ:  
Խորամանկը զոհին գտավ,  
Գլուխ տվեց, խելքը մտավ.  
-Հե՛յ, աչքդ լույս, իշո՛նկ քեռի,  
Որքա՛ն շատ ես դու բախտավոր,  
Արքան շուտով պիտի մեռնի,  
Քեզ է ընտրել նա թագավոր:

Ասում է, որ չկա ոչ ոք  
Քեզնից խելոք ու առավել,  
Ազնիվ, գորեղ, արդարադատ,  
Միայն քեզ է խիստ հավանել:  
Դու՝ խելքի ծով, մեր աչքի լույս,  
Միակն ես դու, անտարակույս,  
Առաքինի ու ողջամիտ,  
Պարկեշտ, բարի, արդարամիտ:  
Դե՛, գլուխդ էլ չտաննեմ,  
Արի՛, նրա կուշտը տաննեմ,  
Մահից առաջ թող քեզ օրհնի  
Եվ սուրբ աջը գլխիդ դնի:  
Պարզամիտը գովեստներից  
Քաջալերվեց, թևեր առավ,  
Իր էջ խելքից, ցավոք սրտի,  
Նենգ աղվեսի ծողակն ընկավ:  
Երբ առյուծը զոհին տեսավ,  
Չհամբերեց, վրա հասավ,  
Սակայն էշը լեղապատառ,  
Թե ոնց եղավ, մահից պրծավ,  
Նույն թուպեին փախավ անտառ...  
Խորամանկի չարչարանքը,  
Ողջ տանջանքը ջուրը լցվեց,  
Իսկ հիվանդը նորից պնդեց,  
Որ իշուկին մոտը բերի...  
-Դե՛, մի քիչ էլ դու համբերի,  
Դժվար գործ է, մե՛ծն արքա,  
Բայց, ճա՞րս ինչ, այլ ելք չկա:  
Նա վերստին անտառ մտավ,  
Փառամոլին հազիվ գտավ,  
Կրկին երգեց իր հին երգը,

Վերսկսեց կեղծ գովերգը,  
Ստի տոպրակն էլի բացեց  
Ու պոչավոր ստեր ասեց:  
Ավանակը վիրավորված՝  
Սուտասանին կտրուկ ասաց.  
-Դու այլևս ինձ չես խաբի,  
Իմ աչքերը էլ չես կապի,  
Մեկ ուրիշին հիմարացրու,  
Գովաբանիր, արքա դարձրու:  
-Ի՛նչ վախում ես, ի՛նչ փոքրոգի,  
Եղի՛ր դույզն-ինչ մեծահոգի,  
Մահամերձը հենց քեզ տեսավ,  
Առույգացավ, տեղից ելավ,  
Որ համբուրի իր ընտրյալին,  
Հապճեպ օրհնի, դնի գահին,  
Իսկ դո՛ւ, անխե՛ղք,  
Քո շահն անգամ չհասկացար,  
Երախտամոռ անպետքի պես  
Թագը թողիր ու հեռացար:  
Աչքակապը խորամանկեց,  
Քամի արեց, լեզու թափեց,  
Այդ փառասեր չորքոտանու  
Խելքը կերավ, դարձյալ խաբեց,  
Չեռաց նրան առաջն արավ,  
Վատառողջի մոտը տարավ:  
Ու այս անգամ անգուրթ արքան  
Խելազուրկի վերջը տվեց,  
Ազահորեն նրան խժռեց,  
Խարդախին էլ բան չտվեց:  
Էշի գանգը երբ որ պոկվեց,  
Ծեր աղվեսի մոտ գլորվեց,

Խորամանկը ծուծը առավ,  
Գաղտագողի ինքը կերավ՝  
Ի հատուցում իր ջանքերի,  
Այդքան կրած տանջանքների:  
Արյունարբուն գանգը տեսավ,  
Անկուշտի պես վրա հասավ,  
Դես պտտեց, դեն պտտեց,  
Ապուշ կտրած շուրջը զննեց:  
-Բա որտե՞ղ է էդ ուղեղը,-  
Հարցրեց նա տեղնուտեղը:  
Աղվեսն էլ՝ թե.  
-Առյու՛ծ արքա, խաչը վկա,  
Ավանակը ուղեղ չունի,  
Չուր մի՛ փնտրի,  
Միևնույն է, դու չես գտնի:  
Եթե ուղեղ նա ունենար,  
Մի՞ թե նորից քեզ մոտ կգար...  
07.05.11.



# Մեծամիտ էշը

Օրերից մի օր  
էշը գլխիկոր,  
Աստժո արձանը  
Իր մեջքին դրած,  
Դանդաղկոտ, կամաց  
Գնում էր քաղաք:  
Իսկ ճանապարհի  
Ամեն մի քայլին  
Ով հանդիպում էր,  
Խոր ակնածանքով  
Երկրպագում էր  
Տիրոջ ոսկեձույլ  
Ու մեծ արձանին:  
Երկարականջը  
Շատ ոգևորվեց.  
Մխալմամբ կարծեց,  
Թե ամենքն իրեն  
Չափազանց հարգում,  
Միրում են, պատվում,  
Գլուխ են տալիս,  
Ծնկի են գալիս:  
Այդ մեծամիտը  
Իր դունչը տնկեց,  
Քիթը վեր ցցեց  
Ու ճամփի կեսին  
Կանգնեց, միտք արեց.  
-Ինչպե՛ս թե, մարդիկ  
Ինձ հարգեն, պատվեն,

Գետին խոնարհվեն,  
Լուռ երկրպագեն,  
Իսկ ես քե՞ն կրեմ...  
Ծեր իշապանը  
Հենց գլխի ընկավ,  
Թե ինչու էլը  
Հանկարծ կանգ առավ,  
Ճիպտոր վերցրեց,  
Տարավ ու բերեց,  
Հիմար իշուկին  
Մի լավ տուր տվեց:  
-Ա՛յ երկարականջ,  
Տխմա՛ր ավանակ,  
Տո հաստագլո՛ւխ,  
Տո էշի՛ քուռակ,  
Խելքդ գլուխդ  
Իսկույն հավաքիր,  
Մի՞թե մարդն էշին  
Կերկրպագի:  
01.08.08.



# Ագահ մրջյունը

Ասում են, թե ժիր մրջյունը  
Մի ժամանակ մարդ է եղել,  
Աշխատել է նա օրնիքուն,  
Չարչարանքով հողը հերկել,  
Մշակել է անդաստանը,  
Քերքը լցրել շտեմարանը:  
Ու թեպետև ամբարները  
Լի են եղել բարիքներով,  
Չի գոհացել իր տքնաջան  
Աշխատանքի պտուղներով:  
Ցանկացել է է՛լ ավելին,  
Թալանել է ուրիշներին,  
Այլոց քերքը ծածուկ կրել  
Եվ ցորենի, հատիկների  
Պաշարներն է համալրել:  
Աստված վերից երբ տեսել է,  
Այդ ամենից զայրացել է,  
Մարդու տեսքից նրան զրկել  
Ու մրջյունի ձև է տվել:  
Այլ կերպար է նա ստացել,  
Միջատների շարքը անցել,  
Բայց չի փոխել գող բնույթը,  
Չի մոռացել սովորույթը.  
Չեռքը ընկած գարի, ցորեն  
Բույնն է կրում ազահորեն:  
30.04.11.



# Կրիան ու արծիվը

Կրիան մի օր երկինք նայեց,  
Արծվի ճախրով շատ հնայվեց  
Ու միտք արեց. «Ա՛խ, երանի՛  
Ես էլ թռչել կարենայի»:  
Ձորեղ թռչնին հույժ նախանձեց,  
Արցունք թափեց ու թախանձեց,  
Որ վերջինս հնար անի,  
Իրեն թռչել ուսուցանի:  
Մրատեսը խիստ շվարեց,  
Դանդաղկոտին հարցում արեց.  
-Ինչպե՞ս պիտի երկինք թռչես,  
Երբ սողուն ես, թևեր չունես:  
Ո՞վ է տեսել թռչող կրիա,  
Անխելք ես դու, Աստված վկա:  
Բայց դե խևին խրատը՝ ինչ,  
Դատարկ խոսք է, ուրիշ՝ ոչինչ:  
Արծիվը էլ չհամառեց,  
Խելագարին վերև հանեց,  
Իսկ բարձունքից երբ բաց թողեց,  
Խենթունկն ընկավ, շունչը փչեց:  
06.06.02.





# Անխելք լուսինը

Լուսնյակը հմուտ  
Դերձակին խնդրեց,  
Որ իրեն համար  
Մի զգեստ կարի,  
Այն լինի հարմար,  
Նախշուն կտորից,  
Վրան էլ փայլուն  
Կոճակներ շարի:  
Ու թե պատվերը  
Նա բավարարի,  
Երդվեց, որ հաստատ  
Լավ կվճարի:  
Վարպետը լուսնի  
Խնդիրքը լսեց,  
Փոքր-ինչ մտածեց,  
Պատասխան տվեց.  
-Այ խելապակաս,  
Խելքի'ց պատուհաս,  
Մի օր դու գեր ես,  
Մի օր էլ՝ նվազ,  
Անմիտ պահանջող  
Ո՞նց բավարարեմ,  
Քո հազով ինչպե՞ս  
Ես հազուստ կարեմ:  
01.05.11.



# Ծերունին և մահը

Աղքատ ծերունին  
Ցախը հավաքած,  
Շալակը առած,  
Սաստիկ կորացած,  
Բեռիցը կքված,  
Դանդաղկոտ, կամաց  
Լեռան քարձունքից  
Իջնում էր հոգնած:  
Ուժերը հատած՝  
Ծերուկը նստեց,  
Աշխարհի մասին  
Տխուր մտորեց.  
-Ես շատ եմ հոգնել  
Էս շան տանջանքից,  
Էս անտանելի,  
Գարշելի կյանքից,  
Որտե՞ղ է մահը,  
Թող գա ու տանի,  
Ծանր բեռից էլ  
Ընդմիջտ ազատի:  
Դեռ չէր ավարտել  
Խոսքը ծերունին,  
Մեկ էլ թիկնոցով,  
Գերանդին ուսին,  
Սև կերպարանքով՝  
Հույժ սարսափազրու,  
Հայտնվեց մահը՝  
Ահեղ, ահարկու:

-Կանչեցի ՚ր դու ինձ,  
Եկել եմ ահա,  
Ես քեզ լսեցի,  
Շուտ մոտոյ եկա,  
Որ հոգիդ առնեմ  
Եվ հետս տանեմ,  
Ցավից, տանջանքից  
Իսպառ ազատեմ:  
Այլևորն իսկույն  
Վախից քար կտրեց,  
Թուրը չորացավ,  
Գույնը խիստ գցեց,  
Լեզուն քերանում  
Մի կերպ պտտեց  
Ու կմկմալով  
Պատասխան տվեց.  
-Խոսքերս բնավ  
Ճիշտ չես հասկացել,  
Ո՞վ է ես կյանքից  
Հոգնել, ձանձրացել,  
Կանչել եմ ես քեզ,  
Որ գաս, ինձ օգնես,  
Ցախով լի պարկը  
Շալակս դնես:  
28.07.08.



# Իշուկն ու գայլը

Էշը դաշտում հանգիստ կանգնած  
Արածում էր, մեկ էլ հանկարծ  
Ծերուկ գայլը սաստիկ քաղցած  
Եկավ-կանգնեց նրա դիմաց:  
Իշուկն իրեն չկորցրեց,  
Կաղ ձևացավ,  
Իր էջ հալով ախոյանին  
Հիմարացրեց, զվարթ ասավ.  
-Բարո՛ւ ես դու էստեղ եկել,  
Աստված է քեզ մոտս դրկել,  
Գիտե՞ս՝ ոտս փուշ է մտել,  
Թե ուզում ես դու ինձ ուտել,  
Էդ անպետքին հանի՛ր, նոր կեր,  
Ա՛յ գայլ ախպեր:  
Աղաչում եմ, շուտ դարմանիր,  
Մի ճար արա, արագ հանիր,  
Եթե ուտես հանկարծակի,  
Տե՛ս, տատասկը քեզ չծակի:  
Էշը նրան այսպես ծաղրեց,  
Ոտքը հապճեպ վերև գցեց,  
Որ սմբակի փուշը հանի,  
Իսկ երբ գայլը ուզեց զննի,  
Ամբողջ ուժով նա հարվածեց,  
Անուղեղի ատամները  
Տեղնուտեղը փորը ածեց:  
Գիշատիչը ցավից ոռնաց,  
Տնքտնքալով հագիվ ասաց.  
-Ո՞վ է տեսել, որ ի ծնե

*Մսագործը բժիշկ դառնա,  
Տե'ղն է ինձ, հա'...*

*05.08.08.*



# Անբախտ ավանակը

Այգեպանը էշ էր պահում,  
Անչափ բեռնում ու չարչարում.  
Խեղճ իշուկը շատ աշխատում,  
Քիչ ուտում էր, շուտ հոգնում էր,  
Չեռքից-ոտքից էլ ընկնում էր:  
Հանգիստ չունեի աշխատանքից,  
Դժգոհ էր իր չարքաշ կյանքից:  
Այդ տանջանքին չդիմացավ,  
Երկնավորին գանգատ արավ,  
Բախտն անիծեց, արցունք թափեց,  
Ոտքերն ընկավ ու պաղատեց,  
Նոր տեր խնդրեց:  
Աստված խղճաց և իշուկին  
Կավագործի մոտ ուղարկեց,  
Սակայն այնտեղ տարաբախտը  
Ավելի վատ վիճակում էր.  
Առավոտից մինչ իրիկուն  
Քուն ու դադար բնավ չունեի,  
Գիշեր ու գօր նա բանում էր,  
Սոված-ծարավ, հալից ընկած,  
Գլուխը կախ ծառայում էր:  
Բրուտից էլ գոհ չմնաց,  
Կրկին Աստծո դուռը գնաց:  
Արարիչը շատ մտածեց  
Եվ այս անգամ ավանակին  
Կաշեգործի մոտ ուղարկեց:  
Չորքոտանին երբ որ տեսավ՝  
Արհեստավորն ինչ է անում,

Ինչպես է նա հեգ կենդանու  
Կաշին սաշկում ու տիկ հանում,  
Գլխի ընկավ,  
Թե իր վերջը ինչ կլինի,  
Որ ինքն էլ է կանգնած հերթի,  
Եվ վաղ թե ուշ կաշեգործը  
Իր կաշին էլ պիտի քերթի:  
Բայց դե, ցավոք, ուշ հասկացավ,  
Իրեն վրա խիստ բարկացավ,  
Դատարկ գլխին նա վայ տվեց,  
Աղիողորմ լացուկոծեց:  
Ահա թե ինչ ուսուցանեց  
Սույն առակը,  
Թե տերերից չդժգոհեր ավանակը,  
Ունեցածով լուռ գոհանար,  
Չար բախտի դեմ չընթրստանար,  
Այս վախճանին միգուցե և  
Երբևիցե չարժանանար:  
**31.07.08.**



# Կուրամուկը

Լույսից հեռու՝ գետնի տակին,  
Բնակվում է ամբողջ տարին  
Միջատակեր մի կաթնասուն,  
Որին խլուրդ կամ էլ այլ կերպ  
Գետնամուկ են մարդիկ ասում:  
Այդ խլմուկը՝ կուրամուկը,  
Իրականում կուրաչք մուկ է  
Եվ ինչքան էլ լինի հմուտ,  
Չի տարբերում ո՛չ լույս, ո՛չ մութ,  
Ո՛չ փայտ, ո՛չ հաց,  
Բայց նա մի օր մորը ասաց.  
- Գիտե՞ս, մայրի՛կ, որ քո բալիկն  
Սկսել է արդեն տեսնել  
Ու տարբերել կավը քարից,  
Խոտը՝ ծառից, լավը՝ վատից:  
Մայր խլուրդը շատ զարմացավ  
Եվ որպեսզի ձագին փորձի,  
Խնկի հատիկ տվեց, ասավ.  
-Թե տեսնում ես, ասա՝ ինչ է:  
Չագուկն էլ՝ թե.  
-Հաստատ խի՞ճ է:  
-Վա՛յ իմ գլխին,  
Իմ խեղճ որդին  
Բուրումնավետ խունկը  
Խճից չի տարբերում:  
Կասկած չկա, նա ոչ միայն  
Այն չի տեսնում, այլ կարծես թե  
Հոտառությունն է կորցնում:  
02.08.08.



# Էջն ու առյուծը

Էջն ու առյուծը  
Օրերից մի օր  
Քարեկամացան,  
Եղբայրներ դարձան:  
Դաշինք կնքեցին,  
Խոստում տվեցին  
Մեկմեկու օգնել,  
Դժվար պահերին,  
Տխուր օրերին  
Իրար սատարել:  
Ախպեր տղերքը  
Առավոտ կանուխ  
Գնացին որսի  
Ու ճամփի կեսին  
Տեսան մեծ քարայր՝  
Այծիկներով լի:  
Եվ որոշեցին՝  
Երկարականջը  
Անձավը մտնի,  
Մի հնար գտնի,  
Նրանց դուրս անի,  
Արքան էլ բռնի,  
Պոզերից քաշի,  
Կացարան տանի:  
Ոնց մտածեցին,  
Այդպես արեցին:  
Առյուծը կանգնեց  
Այրի մուտքի մոտ,

Իսկ ավանակը՝  
Անվախ ու սրտոտ,  
Քարայր խցկվեց,  
Էշի գոռոցով,  
Ծափ ու գոռոցով,  
Հարայ-հրոցով  
Նրանց վախեցրեց:  
Վայրի այծերը  
Իշային տեսքից,  
Հանած ձայներից  
Ահաբեկվեցին,  
Վախը սրտերում,  
Պատի ծեփ դառած՝  
Ահով ու դողով  
Ելքը փնտրեցին:  
Խելառ իշուկը  
Իր հնարանքից  
Թունդ ոգևորվեց,  
Ինքն իրենից գոհ,  
Գլուխ գովելով՝  
Պարծանքով խոսեց.  
-Լա՛վ վախեցրի, չէ՞,  
Վայրի այծերին,  
Դարձրի նրանց  
Հիմա մեր գերին  
Եվ գործն էլ արի  
Կարծես անթերի:  
Իսկ թագավորը  
Բեղի տակ ժպտաց,  
Ծաղրելով ասաց.  
-Ախպե՛ր ավանակ,

Ճիշտը որ ասեմ,  
Քո ով լինելը  
Թե չիմանայի,  
Էդ զոզոռոցից,  
Հարայ-հրոցից,  
Ես էլ անկասկած  
Կվախենայի...

04.05.11.



# Աստղագուշակը

Աստղագուշակը  
Ամեն իրիկուն  
Տնից դուրս գալով՝  
Երկինք էր նայում,  
Աստղերն էր համրում,  
Հաշվարկներ անում:  
Մի երեկո էլ  
Մտքերով տարված,  
Աչքերը հեռու  
Աստղերին հառած՝  
Քայլերը ուղղեց  
Դեպի ջրհորը,  
Բայց, ցավոք սրտի,  
Երկու քայլ չարած՝  
Ընկավ խոր հորը:  
Մի անցորդ տեսավ,  
Հեզունսնքով ասավ.  
-Ողորմի հորդ,  
Ա՛յ դու խելացի,  
Առաջդ նայի՛ր,  
Նոր ճամփադ անցիր:  
Ուզում ես տեսնել՝  
Ինչ կա երկնքում,  
Մինչդեռ առջևդ  
Անգամ չես տեսնում...  
**28.07.08.**

# Աքաղաղն ու գողը

Գողը գյուղում մի տուն մտավ,  
Շատ փորփրեց, բան չգտավ,  
Բակում տեսավ գոռոզ-մոռոզ  
Ման էր գալիս չաղլիկ խորոզ:  
Դես-դեն նայեց, մարդ չտեսավ,  
Ճանկեց նրան, առավ-թռավ:  
Խեղճ արլորի սիրտը ճաքեց,  
Գույնը գցեց, լեղին պատռեց,  
Անմիջապես նա հասկացավ,  
Որ իր վերջը արդեն հասավ:  
Կամաց-կամաց երբ սիրտ առավ,  
Աղաչելով գողին ասավ.  
-Խնդրում եմ քեզ, ինձ խնայիր,  
Քաղցր աչքով դու ինձ նայիր,  
Թե քեզ համար ես անպետք եմ,  
Բայց բոլորին հո շատ պետք եմ.  
Առավոտ վաղ զիլ կանչում եմ,  
Մարդկանց քնից արթնացնում եմ,  
Որ չուշանան բան ու գործից,  
Աշխատանքից կամ դպրոցից:  
Ավագակը քնծիծաղեց,  
Աքաղաղին պատասխանեց.  
-Կարծում ես՝ մե՞ծ բան ես անում,  
Ողջ ավանը ոտքի հանում  
Ու չես թողնում, որ գողանամ,  
Գաղտագողի լուռ հեռանամ:  
Ա՛յ դու անխելք, անմի՛տ, անպե՛տք,  
Քեզ անհապաղ ուտել է պետք:


Այս որ լսեց, հեզ արլորր  
Խիստ մոլորեց,  
Թալանչին էլ տեղնուտեղը  
Նրա վիզը շուտ ոլորեց:  
01.08.08.



# Անճռունի ճայակը

Առյուծ արքան՝ գերիզորը,  
Գազանների թագավորը,  
Որոշեց, որ թռչուններին  
Իր մոտ բերի,  
Մեկիկ-մեկիկ մի լավ տնտղի  
Ու հավքերի արքա ընտրի:  
Դրա մասին հայտարարեց,  
Ամենքին էլ տեղյակ պահեց՝  
Շաքաթ օրը խումբ-խմբովին  
Ներկայանան մեծ ժողովին:  
Էս որ լսեց գեշ ճայակը՝  
Սևուկ-մևուկ այլանդակը,  
Իրար խառնեց ազգուտակը,  
Ընկավ նրանց դուռն ու բակը:  
Սրա-նրա մոտը գնաց,  
Վիզը ծռեց, փետուր մուրաց,  
Թռչուններն էլ չմերժեցին,  
Մի-մի բմբուլ նվիրեցին:  
Նշված օրը, ժամը վեցին,  
Առյուծի շուրջ հավաքվեցին  
Միրամարգը և ագռավը,  
Արծիվն, անգղն ու կաքավը,  
Բազեն, թութակն ու սոխակը,  
Արագիլը, ծիծեռնակը...  
Չկար միայն սև ճայակը՝  
Էն անճռունին, անճարակը:  
Մի կես ժամից երբ ժամանեց,  
Ներկաներին խիստ զարմացրեց.  
Վրան փետուր շարած պես-պես՝

Դարձել էր նա գեղեցկատես,  
Զուգս ընդունել և զարդարվել,  
Տոնածառի պես էր դառել:  
Հպարտ-հպարտ, քիթը ցցած,  
Իր տեսքից գոհ ու հմայված,  
Օրորալով, շորորալով,  
Նազ անելով, կոտրատվելով՝  
Արջնագռավը ծանր ու մեծ  
Եկավ, նրանց առջև տնկվեց:  
Քահակալը ոտքից գլուխ  
Կարգին տնտղեց ու հենց նրան  
Թռչունների արքա ընտրեց:  
Իսկ հավքերը հույժ զայրացան  
Ու խմբովին վրա հասան,  
Դես քաշեցին, դեն քաշեցին,  
Իրենց տված բմբուլները  
Պոկոտեցին, դեն նետեցին:  
Եվ նա դարձավ էլի էն նույն,  
Սովորական գեշ ճայակը,  
Նույն զարշեղին, այլանդակը,  
Մակայն հիմա է՛լ ավելի  
Այլանդակվեց, գզգզորվեց,  
Փետրահանվեց, Աստված գիտի,  
Թե ինչ թռչնի նա նմանվեց...  
Առյուծ արքան միտքը փոխեց  
Ու անճոռնուն գահից գրկեց:  
**02.08.08.**





# Մոծակն ու առյուծը

*Մոծակն եկավ առյուծի մոտ  
Ու հոխորտաց.  
-Ա՛յ պարծենկոտ,  
Չեմ վախենում ես քեզանից,  
Չորավոր չես դու ինձանից,  
Կնոջ պես ես կռիվ անում,  
Սուր ճանկերով աչքեր հանում,  
Կծոտում ես ժանիքներով,  
Ճանկրտում ես ճիրաններով,  
Անգթորեն պատառոտում,  
Անմեղ գոհին զուր հոշոտում:  
Վայել չէ դա արքաներին,  
Բնորոշ է հեզ թույլերին,  
Թե ուզում ես, արի մրցենք,  
Մեր ուժերը հիմա փորձենք:  
Այսպես ասավ,  
Վրա հասավ,  
Տգտագրեց,  
Բզբզագրեց,  
Բաշի շուրջը  
Պտույտ գործեց,  
Մտավ աչքը, խայթեց ունչը,  
Ասեղի պես խրվեց դունչը,  
Հենց նույն պահին  
Լսվեց ուժգին  
Թագավորի սուր մռունչը:  
Մոծակն իրեն փառաբանեց,  
Մեծարելով երկինք հանեց,*

*Խոսքեր ասաց դրվատանքի,  
Շեփոր փչեց հաղթանակի:  
Բայց կարճ տևեց սեզ պարծանքը,  
Գլխին եկավ մեծ փորձանքը.  
Հանկարծ ընկավ ցանց-թակարդը,  
Որ հյուսել էր վարպետ սարդը,  
Ոստայնի մեջ նա խճճվեց,  
Իսկ մամուկը վերջը տվեց:  
Հզորի դեմ իրեն տարած  
Հաղթությունով հպարտացավ,  
Դժբախտաբար այդ չարամիտ,  
Նենգ միջատի զոհը դարձավ:  
01.05.11.*



# ՄԿՆԻԿՆԵՐՐ

Դաշտամուկը և գորշ մուկը  
Ընկերացան, քույրեր դարձան:  
Եկավ գարուն...  
Դաշտամուկը ընկերուհուն  
Իր տուն կանչեց,  
Ցեխակողոլ արմատիքով,  
Հատիկներով ու խոտերով  
Սեղան բացեց:  
Գորշ մկնիկը այս ամենին  
Հենց որ նայեց, սիրտը խառնեց.  
-Փիֆ, էս ի՞նչ է, քո հյուրերին  
Էսպե՞ս ես միշտ հյուրասիրում:  
-Ինչ որ ունեմ, էն եմ բերում:  
-Ես էսպիսի կեղտոտ-մեղտոտ,  
Հոտած-փտած բան չեմ ուտում:  
Թե չգիտես, ասեմ ես քեզ,  
Ապրում եմ ես աղայի պես,  
Տանս ունեմ, ինչ որ ուզես,  
Եթե հյուր գաս, կհամոզվես:  
Երկու օր անց դաշտամուկը  
Ընկերուհուն այցի գնաց,  
Հյուրընկալը նրա առաջ  
Բերեց-դրեց խնձոր ու տանձ,  
Չիր ու չամիչ, ընկույզ, աղանձ,  
Պնդուկ, կաղին, փշատ ու նուշ,  
Է՛լ գետնանուշ՝ անուշ-անուշ,  
Արմավ, կարագ, պանիր ու սեր...  
-Դե՛, թանկագին՛ն, ինչ կուզես, կեր,  
Մի լավ սնվի՛ր, մի՛ ամաչիր:

Մեկ էլ հանկարծ դուռը ճռռաց,  
Մկան խոսքը կիսատ մնաց,  
Մեկը մատան եկավ-զնաց,  
Առավ-տարավ պանիո ու հաց:  
Վախկոտ հյուրը սա որ տեսավ,  
Թուքը սառավ, շատ վախեցավ:  
Քիչ որ անցավ, նա սիրտ առավ  
Եվ հենց ուզեց փոքր լցնել  
Ընկույզ, ադանձ, կարագ ու սեր,  
Մեկ էլ, ըիր', դուռը անտեր  
Կրկին բացվեց... Մուկը վախից  
Գույնը գցեց, պատին գամվեց,  
Դես-դեն նայեց, մի ծակ գտավ,  
Արագորեն մեջը մտավ:  
Տանտիրուհին երբ որ գնաց,  
Դաշտամուկը թեև սոված`  
Ընկերուհուն ախպես ասաց.  
-Մնաս բարով, իմ սիրելի,  
Էս ամենը թող քեզ լինի.  
Ինչի՞ն են պետք լիությունը  
Եվ ճոխ կյանքը,  
Թե որ գլխիս կախված լինի  
Միշտ վտանգը: Լավ է՝ ես իմ  
Արմտիքն ու հատիկն ուտեմ,  
Քայց անվտանգ և ապահով  
Կյանքով ապրեմ:

05.08.08.



# Որսորդները

Ավանակը, ծեր աղվեսը,  
Առյուծ արքան ընկերացան:  
Որոշեցին՝ որսի գնան,  
Ձեռք բերածը իրար միջև  
Անեն բաժան:  
Դես վազեցին, դեն վազեցին,  
Սարեր-ձորեր թափառեցին,  
Չարչարվեցին ու տանջվեցին,  
Մինչև գործը ավարտեցին:  
Երբ տուն հասան,  
Թագավորը թաթով հրեց,  
Որսը էշի առջև դրեց,  
Որ վերջինս այն բաժանի,  
Ամենքին էլ բաժին հանի:  
Իսկ իշուկը եղբայրաբար,  
Շատ անաչառ ու շատ արդար  
Իրենց միջև ազնիվ բաշխեց,  
Համեստորեն մի կողմ քաշվեց:  
-Մե'ծն արքա, Աստված վկա,  
Ազնվաբար և հավասար  
Ամբողջն արի ես մասնեմաս,  
Ընտրի'ր, որը կկամենաս:  
Առյունարբուն շուրջը նայեց,  
Պատառները համեմատեց,  
Քիթ ու մուրթն իրար խառնեց,  
Անուղեղին տեղում խժռեց:  
Քիչ որ անցավ,  
Շեկ աղվեսին առյուծն ասավ.

-Հիմա էլ քո հերթը հասավ,  
Այ խորամանկ, լավ մտածիր  
Եվ ավարը ճիշտ մասնատիր:  
Ծեր խարդախը դույզն-ինչ խորհեց,  
Ռսաածն իրար վրա կիտեց,  
Փորրիկ կտոր առանձնացրեց,  
Առաջնորդին ներկայացրեց.  
-Չորե՛ղ արքա, ահա այսպես,  
Քիչ մասը՝ ինձ, շատ մասը՝ քեզ:  
-Աղվես՝ս ախպեր, ինձ դուր եկար,  
Դու այդ ինչպե՞ս գլխի ընկար,  
Թե ոնց պիտի կերը բաշխես,  
Որ քմահաճ սիրտս շահես:  
Շեկլիկն ասավ.  
-Նահատակյալ ավանակը  
Ինձ դաս եղավ,  
Ու հասկացա, թե որ ես էլ  
Այն բաժանեմ էշավարի,  
Առյուծ արքան ինձ չի ների:  
**09.08.08.**



# Ժլատ մեղուները

Ծաղկից ծաղիկ թռչկոտելով,  
Անուշ նեկտար ժողովելով՝  
Կայտառ ու ժիր միջատները՝  
Մեղուները խմբակային  
Դժվարությամբ արարեցին  
Համեղ մեղրն աստվածային:  
Մարդիկ երբ որ համտեսեցին,  
Մեծ հաճույքով վայելեցին,  
Բուրումնալից և օգտակար  
Հրաշք-մեղրը գովերգեցին:  
Մեղուները աշխատասեր  
Ժլատ էին ու ընչասեր,  
Ուստի Ձևսին ողորեցին,  
Տրտնջացին, բողբոջեցին.  
-Տե՛ր, ուժ տուր մեզ, հզորություն  
Կամ խայթելու մի գորություն,  
Գոնե այդպես մարդկանց վանենք,  
Որ խորհսխը էլ չտանեն,  
Թող մեզ մնա լրիվ բերքը,  
Աստվածային սուրբ մթերքը:  
-Ինչպես կուզեք, ձերն է կամքը,  
Ես չեմ մերժի այդ խնդրանքը,  
Բայց լավ հիշեք, հենց որ խայթեք,  
Կկործանեք ձեր իսկ կյանքը՝  
Ի հատուցում ազահության,  
Չկամության և չարության:  
Ասում են, թե այսուիետև  
Մեղուները երբ խայթում են

*Ու կորցնում ասեղ-խայթը,  
Ընկնում են միշտ  
Իրենց լարած որոգայթը.  
Պահպանելով գանձը անգին՝  
Հրաժեշտ են տալիս կյանքին:  
25.01.12.*





# Պոչատ աղվեսը

Շեկլիկ-մեկլիկ աղվեսը  
Մի օր երբ որս էր անում,  
Թե ոնց եղավ, չգիտեմ,  
Պոչը թողեց թակարդում:  
Լաց-կոծ արավ, մղկտաց,  
Հուսակտուր տուն գնաց  
Ու միտք արեց. «Ի՞նչ անեմ,  
Էսպես պոչատ ո՞նց ապրեմ,  
Առանց ազի որ տեսնեն,  
Կծիծաղեն, կծաղրեն»:  
Գլուխ կոտրեց, չարչարվեց,  
Վերջը մի բան հնարեց,  
Իսկույն ժողով գումարեց,  
Աղվեսներին հավաքեց,  
Իրեն լրջմիտ տեսք տալով՝  
Իմաստալից ճառ ասեց.  
-Իմ քույրիկնե՛ր, եղբայրնե՛ր,  
Իմ թանկագի՛ն ժողովուրդ,  
Ձեզ կանչել եմ, ժողովել,  
Որպեսզի տամ մի խորհուրդ:  
Եկե՛ք, ականջ դրե՛ք ինձ,  
Հրաժարվե՛ք պոչերից,  
Քոքից կտրե՛ք, դեն նետե՛ք,  
Ծանրությունից ազատվե՛ք:  
Ո՞ւմ են դրանք զարդարել,  
Իզուր տեղը բեռ դառել,  
Կախ են ընկել մեզանից,  
Ո՛չ ձեզ են պետք, ո՛չ էլ՝ ինձ:

Երբ ելույթը ավարտեց,  
Հեռու քաշվեց ու կանգնեց,  
Առաջ եկավ մի աղվես  
Եվ սկսեց խոսքն այսպես.  
-Ա՛յ խորամանկ, աներե՛ս,  
Հերի՛ք լեզու դու թափես,  
Քաղցր-մեղր ճառ ասես,  
Քո կարճ խելքով մեզ խաբես:  
Փորացավդ իմացանք,  
Միտքդ շատ լավ հասկացանք,  
Մի՞թե այնքան հիմար եմք,  
Որ հորդորիդ հետևենք:  
28.07.08.



# Պարծենկոտ ջորին

Փոքրիկ ջորին  
Կերավ գարին,  
Թափ հավաքեց,  
Գոտեպնդվեց,  
Քամու նման  
Նա սլացավ,  
Արագ վազքով  
Հպարտացավ:  
Քիթը մեկեն  
Վերև գցեց,  
Պարծենալով  
Բացականչեց.  
-Իմ ծագումը  
Ինձ հայտնի է,  
Հաստատ գիտեմ՝  
Մայրս ձի է,  
Դրա համար  
Ահա էսպես  
Վարճում եմ ես  
Ձիուկի պես:  
Բայց քիչ հետո  
Ձայնը կտրեց,  
Երբ էշ հորը  
Ստաբերեց:  
Ու հասկացավ,  
Որ ինչքան էլ  
Գլուխ գովի,  
Հպարտանա,

*Խառնիխուռն  
Իր սերունդը,  
Մութ անցյալը  
Չի մոռանա:  
01.05.11.*



# Արևն ու քամին

Արևն ու քամին  
Մի օր վիճեցին,  
Թե ով է հզոր  
Ու ամենազոր:  
Եվ որոշեցին,  
Պայման կապեցին՝  
Ով մարդու հագից  
Հագուստը հանի,  
Գրազը, հարկավ,  
Նա էլ կտանի:  
Քամին զայրացավ,  
Փոթորիկ դարձավ,  
Այնպես փրփրեց,  
Այնպես կատաղեց,  
Թփերն ու ծառերն  
Արմատից հանեց:  
Բայց ինչքան ջանաց,  
Որքան էլ փորձեց,  
Քաշեց-քաշքշեց  
Եվ թափահարեց,  
Մարդու զգեստը  
Հագից չհանեց:  
Ինչքան շատ փչեց,  
Նա այնքան մրսեց,  
Ամուր փաթաթվեց,  
Տարուկ հանդերձը  
Հապճեպ ամրացրեց:  
Քամին երբ տեսավ՝

Ոչինչ չստացվեց,  
Իր տեղը զիջեց  
Եվ մի կողմ քաշվեց:  
Հուր-արեգակը  
Շատ ոգևորվեց,  
Որ մրցակիցը  
Ջենքը ցած դրեց:  
Արեգը ժպտաց,  
Հողը ջերմացրեց,  
Մարդն անչափ շոգեց,  
Շորերը հանեց:  
Ահա թե ինչպես  
Արփին ժպտերես  
Դաս տվեց քամուն,  
Հաղթեց թշնամուն:  
28.07.08.



# Եղեգն ու կաղնին

Եղեգն ու կաղնին  
Բուռն վիճեցին,  
Թե ով է ուժեղ,  
Ամուր և գորեղ:  
Վեճի թունդ պահին  
Քամի բարձրացավ,  
Եղեգր դողաց  
Ու մի բուռ դարձավ:  
Ճկվեց, կռացավ,  
Գետին խոնարհվեց,  
Ահեղ փոթորկին  
Նա դիմակայեց:  
Հաստաբուն կաղնին  
Կանգնեց շատ հպարտ,  
Ինքն իրենից գոհ,  
Անհաղթ ու անպարտ:  
Խելառ մրրիկը  
Սաստիկ կատաղեց,  
Ծառը արմատից  
Պոկեց, տապալեց:  
Ինքնագոհ կաղնին  
Գետին գլորվեց,  
Խոնարհ եղեգր  
Փոթորկից փրկվեց:  
Այսպես է կյանքում.  
Տերը գոռոզին՝  
Ամբարտավանին,  
Ծնկի է քերում,

*Իսկ խոնարհներին  
Դժվար պահերին  
Նեցուկ է դառնում,  
Պահում-պահպանում:  
28.07.08.*





# Ապաշխարող գայլը

Գայլը մի օր հիվանդացավ,  
Ջերմությունը շատ բարձրացավ,  
Ջանը դողաց, գույնը գցեց,  
Ճարահատյալ երկինք նայեց:  
Ջերմ աղոթեց հայր-Բարձրյալին  
Եվ ուխտ արեց, որ մի տարի  
Կապաշխարի, պաս կպահի,  
Իր բերանը միս չի տանի,  
Միայն թե Տերն իրեն փրկի,  
Ապաքինի, ոտքի հանի:  
Կարճ ժամանակ որ անց կացավ,  
Տկար գայլը առողջացավ,  
Ոտքի ելավ, մտավ անտառ,  
Մեկ էլ հանկարծ դեմը ելավ  
Ախորժելի մի թխլիկ գառ:  
Փութկոտ լիզեց շրթունքները  
Եվ սոռացավ խոստումները.  
«Արի ուտեմ անտեր գառին,  
Պաս կպահեմ հաջորդ տարի»:  
Վրա հասավ, զոհին բռնեց,  
Պատառոտեց, փորը լցրեց:  
Գիշատիչը սուրբ չի դառնա.  
Ինչքան էլ որ անմեղանա,  
Աղոթք անի, ապաշխարի,  
Իր բնույթը նա չի փոխի.  
Գայլ ծնվել է, գայլ կմեռնի:  
**05.08.08.**

# Այրի կինն ու հավը

Այրի կինը հավիկ ուներ,  
Որն ամեն օր մի ձու կածեր,  
Այդ հավկիթը վաճառելով՝  
Օրվա հացը կվաստակեր:  
Ընչաքաղցը չգոհացավ,  
Է՛լ ավելին նա ցանկացավ  
Եվ մտածեց, թե ո՞նց անի,  
Որ հավը շատ ձվեր հանի:  
Առավոտից մինչ իրիկուն  
Կերակրում էր, հա կերակրում,  
Ինչքան լավ էր նրան նայում,  
Հավիկն այնքան քիչ էր ածում:  
Կշկջանը շուտով տոզեց,  
Փորը ոռավ, գետնին քսվեց,  
Առատ կերից ճարպակալեց  
Ու այլևս ոչինչ չածեց:  
Առակս ի՞նչ կուտուցանե,  
Այն, որ մարդը աչքածակ է,  
Իսկ հաճախ էլ շատին ձգտում,  
Ունեցածն է նա կորցնում:  
29.07.08.



# Հնարամիտ մարդը

Տերը մարդուն կավից կերտեց,  
Նրան հոգի, շունչ պարգևեց,  
Կյանք շնորհեց և հորդորեց,  
Որ նա ապրի մարդավայել,  
Մարդավարի, լինի պարկեշտ,  
Արդարամիտ, ազնիվ, բարի:  
Աչքածակը իրեն տրված  
Տարիներով չգոհացավ,  
Է՛լ ավելին նա ցանկացավ,  
Մտածեց՝ ո՞նց հաջողացնի՝  
Կյանքը դույզն-ինչ երկարացնի:  
Հենց որ ցրտեց եղանակը,  
Մարդը շինեց իր հյուղակը,  
Մեջը մտավ, պատասպարվեց,  
Ցրտին մի կերպ դիմակայեց:  
Պաղ ձմեռը երբ սաստկացավ,  
Էշը մրսեց, հիվանդացավ,  
Խուլ տնակի դուռը ծեծեց,  
Աղերսագին լացուկոծեց.  
-Աղաչում եմ, ներս ընդունիր,  
Տանդ տեղ տուր, ապաստանիր,  
Մինչև գարուն պահիր քեզ մոտ,  
Տուր ինձ վարսակ, գարի ու խոտ:  
Աղամորդին նրան լսեց,  
Փոքր-ինչ խորհեց, հետո ասեց.  
-Թե որ կյանքիդ կեսը ինձ տաս,  
Ինչ խնդրեցիր, այն կստանաս:  
Ավանակի ճարը կտրեց,

Պահանջածը նրան տվեց,  
Ներս խցկվեց, պատսպարվեց,  
Յրտին, սովին դիմակայեց:  
Քիչ անց խոզը դուռը թակեց,  
Աղի-լեղի արցունք թափեց,  
Նույն պայմանին համաձայնեց,  
Գյուղացու մոտ հանգրվանեց:  
Շունն էլ եկավ, շատ կաղկանձեց,  
Լաց-կոծ արավ ու թախանձեց,  
Սա էլ կյանքի կեսը տվեց,  
Յրտից, քաղցից կաշին փրկեց:  
Ասում են, թե սույն օրվանից  
Աստվածատուր տարիներին  
Մարդն ապրում է մարդավարի,  
Իսկ մնացյալ մյուս կեսը,  
Որ պոկել էր այդ չտեսը  
Ավանակից, խոզից, շնից,  
Անց է կացնում շատ տանջալի.  
Էշի բաշխած տարիներին  
Աշխատում է գիշեր ու գօր,  
Մաստիկ տանջվում ու չարչարվում,  
Անխոնջ բանում: Խոզի տված  
Կյանք-օրերին ապրում է նա  
Խոզի նման, խոզավարի:  
Շան ընծայած տարիներին  
Գոյությունը քարշ է տալիս  
Մի շան հալի, դառնում է չար  
Եվ բանբասկոտ,  
Սրա-նրա միսն է ծամում,  
Գզվռտում է, կռիվ անում:  
**06.08.08.**



ՔԱՌՅԱԿՆԵՐ





ՍՈՒՅՆ  
ՔԵՐԹՎԱԾՔՆԵՐԸ՝  
ԳԵՐՀՈԳՈՒՅ ԲԽԱԾ  
ԽՈՀՈՒՆ ԳԱՆՁԵՐԸ,  
ԱՄԵՆԱՅՆ ՍԻՐՈՎ ՈՒ  
ԱԿՆԱԾԱՆՔՈՎ  
ՉՈՆՈՒՄ ԵՄ ՄԵԾՆ  
ԱՐԱՐՉԱՊԵՏԻՆ՝  
ՏԻԵԶԵՐԱԿԱՆ  
ՆԵՐՀՈՒՆ  
ՎԱՐՊԵՏԻՆ:

Մա' էլ կանցնի, մի' վշտացիր, ցավին մի կերպ  
դիմացի'ր,  
Հարատև չէ ոչինչ կյանքում, հաստատապես  
իմացիր.  
Դժբախտություն, երջանկություն հաջորդում  
են մեկմեկու,  
Ինչպես մահին` հաջորդ կյանքը, մթին` լույսը  
կենսատու...  
05.02.12.



Եթե տաճար պիտի մտնես, աղոթք անես, մոմ  
վառես,  
Իսկ հետո էլ ստես, կեղծես, թալանես ու  
սպանես,  
Լա'վ իմացիր, ոչ թե Աստծուն, այլ հենց քեզ ես  
դու ծաղրում,  
Բարեպաշտի, սրբի դեմքով ապուշի դեր ես  
խաղում:  
05.02.12.



-Թե Աստված կա, որտե՞ղ է Նա, ինչո՞ւ երբեք  
չեմ տեսնում,  
Իմ տրտունջը, աղոթքները ինչո՞ւ երկինք չեն  
հասնում...  
-Է՛յ, կարճամիտ, ապրի'ր այնպես, որ Տերն  
ինքը տեսնի քեզ,  
Այդժամ Նրան ոչ թե աչքով, այլ քո հոգով  
կտեսնես:  
05.02.12.

Ասում են, թե մարդու աչքը հողում է լույ  
լիանում,  
Ինչ էլ տրվի, ինչքան դիզի, մեկ է, նա չի  
գոհանում...  
Մերկ ենք ծնվել ու այդպես էլ պիտի երթանք  
աշխարհից,  
Այս ամենը չի մնալու ո՛չ ձեզ, ո՛չ քեզ, ո՛չ էլ՝  
ինձ:

06.02.12.



Հոգին մարդու էությունն է՝ անծին, անմահ,  
անայուն,  
Հող-մարմինը անցավոր է, մահկանացու,  
անկայուն,  
Հոգին մենք ենք, մեր բուն եսը, իսկ մարմինը՝  
լույ պատյան,  
Առանց եսի այն մեռած է, անշունչ դի է նա  
միայն:

06.02.12.



Հողը ինչքան տրորվում է, ավելի է  
պնդանում,  
Մարդը ինչքան տառապում է, ավելի է  
մարդանում,  
Ծառ ու ծաղիկ, թիթեռ ու ճանճ չգիտեն,  
թե ցավն ինչ է,  
Նրանց համար երջանկություն կամ  
տխրություն ոչինչ է:

06.02.12.



Տիեզերքի գաղտնիքները՝ խորախորհուրդ,  
անմեկին,  
Շատ հազվադեպ բացահայտվում, հայտնվում  
են այն մեկին,  
Ով մշտապես որոնել է, փնտրել իմաստն այս  
կյանքի,  
Ում որ Տերը միշտ ձաղկել է՝ ենթարկելով  
տանջանքի:  
06.02.12.



Արդարությունն ու պատիժը երբեք էլ չեն  
հապաղում.  
Մեր լավ ու վատ արարքների պտուղներն ենք  
միշտ քաղում,  
Թե հաջողվի մեզ խուսափել պատիժներից  
երկրային,  
Մենք չենք կարող բնավ խույս տալ  
Դատավորից երկնային:  
06.02.12.



Թե շարունակ մենախոսես, անշո՛ւշտ, իրավ  
կլիներս,  
Եթե անվերջ գովքդ անես, հարկա՛վ, լավը  
կլիներս...  
Ա՛յ մեծամիտ, ինքնահավա՛ն, հերիք չեղա՛վ  
քեզ գովես,  
Չէ՞ որ ինքդ հստակ գիտես՝ իրականում դու  
ով ես:  
06.02.12.

Առանց փշի վարդ չի լինում – նա էլ ունի  
թերություն,  
Առանց դարդի մարդ չի լինում – հո սա՞ էլ չէ  
նորություն,  
Հոգ չէ, սակայն, երբ ալ վարդը մեր մատներն  
է ծակոտում,  
Իսկ ի՞նչ անենք, երբ սև դարդը նուրբ հոգին է  
խոցոտում:  
06.02.12.



«Էշի քացուց չեն նեղանա», - կա այսպիսի  
ասացվածք,  
Անչափ դիպուկ, դույզն-ինչ կոպիտ, բայց  
ճշմարիտ է ասված:  
Եթե կյանքում ինչ-որ մեկը գուր տեղը տա  
աքացի,  
Ավանակի բնույթն է դա, նրանից մի՛  
նեղացի:  
07.02.12.



Ամեն փորձանք՝ մի-մի հորդոր, մի-մի  
խորհուրդ մեզ համար,  
Կյանքում շատ կան փորձություններ, ցավեր,  
դավեր անհամար,  
Բայց դե խսին խրատը՝ ինչ. որքան ծեծվի ու  
դադվի,  
Միևնույն է, չի խրատվի, կյանքից դասեր չի  
քաղի:  
07.02.12.

Պարտություններ ու հաղթանակ,  
ձեռքբերումներ ու կորուստ  
Ռոշված են ի սկզբանե, սահմանված են  
ի վերուստ,  
Մարդն անցնում է Տիրոջ կողմից նախանշված  
իր ուղին,  
Ծնվում, ապրում և վաղ թե ուշ հանձնվում է  
մայր-հողին:  
07.02.12.



Մարդ չի կարող երբեք գործել Երկնավորին  
հակառակ,  
Լինի նա սուրբ, լինի արդար կամ՝ անբարո,  
անառակ,  
Բախտը փոխել, հունից շեղել չի հաջողվել ոչ  
մեկին,  
Լինի ահել, լինի ջահել, լինի դա այր կամ թե՛  
կին...  
07.02.12.



Լոտոս ծաղկի թերթիկի պես բացվեց աչքը իմ  
հոգու  
Այն ժամանակ, երբ խոր ցավից սրտիս վերքն  
էր ամորվում,  
Լույս-աչքերով տեսա Նրան՝ տիեզերքը  
Ստեղծողին,  
Պայծառ մտքով ըմբռնեցի գոյիս իմաստը  
խորին:  
07.02.12.

Ես հինդու եմ, դու՝ քրիստոնյա, մեկ ուրիշը՝  
հեթանոս,  
Մահմեդական, բուդդայական... Սաստիկ խառն  
է ու քառու.  
Չի ճանաչում հոգին երբեք ազգություն կամ  
դավանանք,  
Մենք ոգեղեն էակներ ենք, ե՞րբ պիտի սա  
հասկանանք:  
07.02.12.



Հենց փչում է շունչը վերջին և մարմինը  
մահանում,  
Հոգին ազատ թռչնակի պես թռչում է ու  
հեռանում...  
Դարեր ի վեր դեգերում է տիեզերքում  
անսահման՝  
Մահից հետո ձեռք բերելով մեկ այլ մարմին-  
կացարան:  
08.02.12.



Հնուց եկած մայր-գրքերը՝ Վեդաները  
սրբազան,  
Ծնունդ առան Աստծո շնչից, որ ազգերին  
այլազան  
Աստվածային գիտությունը ուսուցանեն ու  
կրթեն,  
Որ չմնան մութ-խավարում, լույսի ուղին հեշտ  
գտնեն:  
08.02.12.

Երագում ինձ սպանեցին, ինքս ինձնից  
հեռացա,  
Անէացա, ելա երկինք, իսկ երբ ահից  
արթնացա,  
Տերը ասաց. «Մի՛ երկնչիր, քեզ սպանել չեն  
կարող.  
Դու հոգի ես, ոչ թե՛ մարմին, հուր-կրակ ես, ոչ  
թե՛ հող»:  
08.02.12.



Ամեն կրոն ծնունդ ունի, ունի սկիզբ և  
ավարտ,  
Իսկ հավատքը մշտագո է, հարամնա,  
անադարտ,  
Պաշտամունքը ձև է միայն, խոր հավատը՝  
էություն,  
Առանց որի ո՛չ մի կրոն չունի երկար  
գոյություն:  
08.02.12.



Չունեցածի համար երբեք դու մի՛ տխրիր  
ու լացիր,  
Ուրախացիր քեզ տրվածով, եղածով էլ՝  
գոհացիր:  
Որ խորհրդիս ունկն դնես, խելամիտ մարդ  
կլինես,  
Անհնարին թե չձգտես, փոքր-ինչ անդարդ  
կլինես:  
08.02.12.

Ասում են, թե նյութ-աշխարհը խավարակուռ  
մի բանտ է.  
Վաղնջական ժամանակից հոգին այստեղ  
պատանդ է,  
Հենց պատրանքին գերի դարձավ, երկինք-  
տնից հեռացավ,  
Կալանավելով նյութի կողմից՝ անեղծ հոգին  
մարմնացավ:  
**08.02.12.**



Հավերժի դեմ, հավերժի մոտ մարդու կյանքը՝  
լույ վայրկյան,  
Ընդամենը ակնթարթ է, սոսկ հպանցիկ պահ է  
այն...  
Օգտվելով այս պահ-կյանքից՝ փնտրենք  
ճամփան անհունի,  
Թե չէ այսպես մենք նման ենք թափառական  
անտունի:  
**08.02.12.**



Հերիք չեղա՞վ՝ կրոնները պայքար մղեն իրար  
դեմ,  
Հերիք չեղա՞վ՝ ժողովուրդներն իրար անդուլ  
հոշոտեն...  
Բա՛վ է արդեն, դաշինք կնքեք ու հաշտություն  
բաղձալի,  
Մենք բոլորս զավակներն ենք, կայծ-մասնիկը  
Բարձրյալի:  
**09.02.12.**

Երջանկություն, պատիվ ու փառք անցողիկ են,  
պատրանք են,  
Հարստություն, գոհար ու գանձ վաղանցիկ են,  
խաբկանք են.  
Այսօր ունենք, վաղը՝ չկան, իսկ մենք՝ գերին  
պատրանքի,  
Մե՛րթ վայելում, մե՛րթ ողբում ենք՝  
ենթարկվելով զրկանքի:  
**09.02.12.**



Մե՛կ Աստված կա, մե՛կ Արարիչ՝  
Ճշմարտություն Բացարձակ,  
Չեմ երկմտում, հաստատապես ասում եմ ես  
համարձակ,  
Որ բազում են ուղիները Գերագույնին  
հասնելու,  
Ո՛չ մի կրոն չունի հիմքեր իրեն բարձր  
դասելու:  
**09.02.12.**



Մեր կարճ խելքով, խավար մտքով կրոններ  
ենք հնարում,  
Այլ հավատքի ու ազգության մարդկանց իրար  
դեմ լարում,  
Մինչդեռ հոգու գիտությունը, որն առկա է  
հավիտյան,  
Չի ճանաչում ո՛չ դավանանք, ո՛չ ազգ, ո՛չ սեռ,  
ո՛չ սահման:  
**09.02.12.**

Կյանքը խաղ է, վերջը մահ է, մահը ահ է ու  
կրկին  
Մահն սկիզբ է, մահն էլ խաղ է և նոր կյանք է  
վերստին.  
Ծնունդ ու մահ, սկիզբ ու վերջ հաջորդում են  
անդադար,  
Օրենքն է սա տիեզերքի, որ գործում է  
դարեդար:  
09.02.12.



Առանց Տիրոջ թույլտվության կյանքում ոչինչ  
չի լինում,  
Ծննդուն առանց Հոր գիտության ճյուղից  
գետին չի ընկնում,  
Ուր մնաց, թե մարդն ինքնական վերջ տա  
կյանքին, մահանա,  
Դեմ գնալով Աստծո կամքին՝ ինքնագլուխ  
հեռանա:  
09.02.12.



Արարիչը հստակ գիտի, թե ում ինչ է  
հարկավոր,  
Հանուն շահի կարիք չկա բերան ծռել ամեն  
օր,  
Նյութի համար աղոթք անել և հաց մուրալ մեր  
Հորից,  
Լցնել անտակ փոր-որկորը, խնդրել դարձյալ  
ու նորից...  
10.02.12.



Հգորի դեմ մենք անգոր ենք, չար բախտի դեմ՝  
անկարող,  
Մեկ է, ինչքան գլուխ կոտրենք, ոչինչ անել  
չենք կարող.  
Ո՞ր անճարն է ճարը կտրած՝ բախտը շտկել,  
փոփոխել,  
Այդ ո՞ր մեկն է ազատ կամքով ի՞ր իսկ  
կյանքում բան փոխել:  
10.02.12.




Տարածություն և ժամանակ մտքով կտրի  
ու անցա,  
Ճանաչեցի Երկնավորին, ով լինելս  
իմացա,  
Օտարացա ու հեռացա այլասերված այս  
դարից,  
Ուր մարդ կոչվածն ու կենդանին չեն  
տարբերվում իրարից:  
11.02.12.





ՀԱՆԵԼՈՒԿՆԵՐ





*Նա մի փոքրիկ կաթնասուն է,  
Ո՛չ մկնիկ է, ո՛չ թռչուն է,  
Պռչիկ ունի, հովհար-թևեր,  
Մազոտ մարմին, մանրիկ աչքեր:*



*Չեռագործի հնուտ վարպետ,  
Բայց չի հյուսում գորգ ու կարպետ,  
Առանց շյուղի ցանց է գործում,  
Իր զոհերին այդպես որսում:*



*Աղջիկ է, բայց պոչիկ ունի,  
Հարսիկ է, բայց շորիկ չունի,  
Դիցուի է անգուգական,  
Հեքիաթային, անիրական:*



*Ամառ-ձմեռ թասակով է,  
Թզուկ է, կարճ հասակով է,  
Մե՛կ համեղ է, ախորժարեր,  
Մե՛կ էլ՝ թունոտ ու մահարեր:*



Փոքրիկ գունդ է՝ պատկերագարդ,  
Խայտաբղետ և գունագարդ,  
Աջ ու ահյակ պտտելիս  
Աշխարհով մեկ ման ես գալիս:



Գետնատարած գնդիկը՝  
Հաստագլուխ ցմփորիկը,  
Մե՛րթ Մոխրոտի կառքն է դառնում,  
Մե՛րթ՝ մարդկային կերպար առնում:



Գլանաձև, վրան կաշի,  
Առանց նրա էլ ի՞նչ տաշի...  
Երբ ծեծում են, նա չի լացում,  
Այլ բոլորին պար է ածում:



Կենդանի է նա ընտանի,  
Ե՛վ կաթնատու, և՛ պիտանի,  
Դեռ շատ վաղուց Հնդկաստանում  
Մուրր էակ է այն համարվում:



9

*Մարմին ունի մետաղից,  
Ժանիքները՝ սուր ու ցից,  
Առաջ ու ետ գնալիս  
Փշուրներ է շաղ տալիս:*



10

*Լողացող է, ձկնիկ չէ,  
Չու ածող է, հավիկ չէ,  
Հենց որ գարուն է գալիս,  
Ուրախ համերգ է տալիս:*



11

*Թերթեր ունի, վարդ չէ,  
Շապիկ ունի, սարդ չէ,  
Ընկերացի՛ր նրա հետ,  
Որ չմնաս դու տոգետ:*



12

*Ձրի միջին լողում է,  
Գետնի վրա սողում է,  
Քաղցի հանդեպ՝ դիմացկուն,  
Խորագետ է, իմաստուն:*

13

*Նախշագարդ է, տարբեր ձևի,  
Խավավոր է, առանց թևի,  
Այնուհանդերձ հեքիաթներում  
Մավառնում է բարձունքներում:*

14

*Հաղթանդամ է, բոյ-բուսաթով,  
Անց է կենում անապատով,  
Տեղափոխում ծանր բեռներ,  
Մեջքին ունի լեռ կամ լեռներ:*

15

*Երբ մութ գիշերն է գալիս,  
Վերից աչքով են տալիս  
Կանթեղները լուսավոր,  
Սրածայր ու թևավոր:*

16

*Արշալույսին ոսկե կառքով  
Երկինք ելնում, պտտվում,  
Իրիկունը տուն է դառնում,  
Իր մոր գրկում քուն մտնում:*



17

*Թռչնակ չէ, բայց թևավոր է,  
Գեղեցկադեմ, լուսավոր է,  
Արարած է եթերային,  
Պատգամաբեր աստվածային:*



18

*Ուղղանկյուն է, բացիկ չէ,  
Պուտավոր է, գատիկ չէ,  
Քարեր ունի, որոնցով  
Խաղ ենք անում մերոնցով:*



19

*Օրոր-շորոր ման է գալիս,  
Ջրի միջին լող է տալիս,  
Լայնակտուց ու կարճատուտ,  
Կարճիկ վզով, սաստիկ վախկոտ:*



20

*Մողուն է շատ վտանգավոր,  
Ջրաբնակ ու կեղծավոր,  
Որսից առաջ սուգ է կապում,  
Կեղծ արցունք է աչքից թափում:*



21

*Երկկենցաղ է,  
Գորտի նման,  
Հետն էլ անպոչ,  
Մեծաբերան:*



22

*Այն և՛ բույս է,  
Ե՛վ մարմնի մաս,  
Դե՛ գուշակիր,  
Թե կարենաս:*



23

*Ճյուղեր ունի  
Վարսի պես,  
Լաց է լինում  
Հարսի պես:*



24

*Մարմին է, բայց  
Գլուխ չունի,  
Թևեր ունի,  
Ոտեր չունի:*





25

Ասեղ ունեմ,  
Բայց ծակ չունի,  
Փոխարենը  
Գլխարկ ունի:



26

Գետաբնակ  
Մեծ կաթնասուն,  
Գիտե՞ս՝ նրան  
Ինչ են ասում:



27

Երեք խոշոր  
Աչք ունի,  
Ամեն մեկը  
Մի գույնի:



28

Մոլորակ է այն  
Եվ քիմիական տարր,  
Դե ասա՝ ինչն է,  
Թե գլխի ընկար:



Կրորիկ է գնդի պես,  
 Ջուրավոր է գերրի պես,  
 Երբ լավ հասած է լինում,  
 Անուշ համ է ունենում:



Արմատ ունի, ծառ չէ,  
 Պսակ ունի, հարս չէ,  
 Արցանի պես բռնում է,  
 Աղացի պես մանրում է:



Յոթ քույրեր են երգեցիկ,  
 Մեղեդային, գեղեցիկ,  
 Մեկը մեկից տարբերվող,  
 Ախորժածայն ու գերող:



Բերան չունի, սուլում է,  
 Ոտքեր չունի, սուրում է,  
 Քաշքշում է, պար գալիս,  
 Աղբ ու փոշի շաղ տալիս:

Ո՛չ վագր է, ո՛չ էլ՝ ձի,  
 Բայց ասում են վագրաձի,  
 Թե որ մի քիչ մտածես,  
 Հանելուկը կլուծես:

Արեգի պես կլոր է,  
 Մանգաղի պես կեռ-կոր է,  
 Երբ որ գիշերն է ընկնում,  
 Թառում է մութ երկնքում:

Խոշորակն, կեռաքիթ,  
 Հայացք ունի անքթիթ,  
 Գիշերները կռնչում,  
 Սարսափ է մեզ ներշնչում:

Մարդու նման ման է գալիս,  
 Ձկնիկի պես լող է տալիս,  
 Թռչուն է այն սև ու ճերմակ,  
 Թևիկները՝ փոքրիկ լողակ:

Շնագգի է, խորամանկ,  
 Սուր դնչիկով, մորթին՝ թանկ,  
 Գիշատիչ է, կարծատոտ,  
 Նախշուն պոչով՝ թավ, բրդոտ:

Ջրային բույս՝ ծաղիկներով  
 Եվ ուտելի պտուղներով,  
 Աստվածային, գեղեցկաթույր,  
 Սրբազան և անուշաբույր:

Չարթուցիչ է, բայց շնչավոր,  
 Այ մորուքով, կտուցավոր,  
 Այգաբացին հենց արթնանում,  
 Չիլ կանչում է, քնից հանում:

Պոչիկ ունի ու չորս թաթիկ,  
 Սողուն է նա՝ աշխույժ, ճարպիկ,  
 Բռնվելիս պոչը պոկում,  
 Ճողոպրում է, կյանքը փրկում:



Գոտի է լայն, աղեղնավոր,  
 Եթերային ու գունավոր,  
 Ծնվում է նա լուրթ երկնքում,  
 Մահկանացուն շուտով կնքում:



Էակ է չար, մտացածին,  
 Մութ աշխարհից, խավարածին,  
 Մեծ երախից հուր է թափում,  
 Ջրի ճամփան՝ ակր փակում:





## Պատասխաններ

1. Չղջիկ
2. Սարդ
3. Ջրահարս
4. Սունկ
5. Գլխբուս
6. Դդում
7. Դեղ
8. Կով
9. Սղոց
10. Գորս
11. Գիրք
12. Օձ
13. Գորգ
14. Ուղտ
15. Աստղեր
16. Արև
17. Հրեշտակ
18. Դոմինո
19. Բաղ
20. Կոկորդիլոս
21. Դողոշ
22. Բագուկ
23. Ուռենի
24. Աստղ
25. Գնդասեղ
26. Գետածի
27. Լուսագղանշան
28. Ուրան
29. Չմերուկ
30. Ատամ
31. Չայնանիշ
32. Քամի
33. Ջեբր
34. Լուսին
35. Բու
36. Պինգվին
37. Աղվես
38. Լոտոս
39. Աքաղաղ
40. Մողես
41. Ծիածան
42. Վիշապ

## Ծանոթագրություններ

ԱԴՈՆԻՍ–Այս անունը փյունիկերեն նշանակում է «պարոն»: Հույները սույն առասպելը փոխառել են փյունիկցիներից, վերջիններս էլ՝ բաբելացիներից, ովքեր ունեցել են պատմություն սիրո աստվածուհի Իշտարի և գեղեցիկ Թամնուզի՝ մեռնող ու ամեն գարնան հարություն առնող աստծո մասին:

ԱԹԵՆԱՍ–ՊԱԼԼԱՍ–Հունական դիցարանի գլխավոր աստվածություններից մեկն է, Չևսի դուստրը: Եղել է իմաստության ու ռազմի դիցուհին, արհեստների և գիտության հովանավորը: Համարվել է քաղաքների, մասնավորապես՝ Տրոյայի պահապանը, Աթենքի անվանադիրը:

ԱԻԴ–Նույն ինքը՝ Հադեսը:

ԱԿՏԵՈՆ–Թեբեի թագավոր Կադմոսի դստեր որդին:

ԱՄՊԱՀԱԼԱԾ–Չևսի մակդիրներից է:

ԱՄՊՐՈՊԱՅԻՆ–Չևսի մակդիրներից է:

ԱՊՈԼԼՈՆ–Չևսի և Լետոյի որդին, արվեստների հովանավորն ու մուսաների առաջնորդը: Համարվել է լույսի և ապագան կանխատեսող աստված:

ԱՏԼԱՍ–Տիտան, Պրոմեթևսի եղբայրը: Աստվածների դեմ տիտանների հետ կռվելու համար Չևսը

նրան դատապարտեց «երկրի ծայրում» հավերժ կանգնած պահել երկնականարը:

ԱՐԱՔՆԵ–Իդմոնոսի դուստրը:

ԱՐԾԱԹԱՂԵՂ–Ապոլլոնի մակդիրներից է:

ԱՐՏԵՄԻՍ–Ապոլլոնի երկվորյակ քույրը, որսորդության դիցուհին, կենդանիների պաշտպանն ու ծննդաբերության հովանավորը:

ԱՖՐՈԴԻՏԵ–Սիրո և գեղեցկության դիցուհին:

ԳԱՐ ԳԱՓԻԱ–Հովիտ Բեովտիայում՝ համանուն աղբյուրով:

ԳԵԱ–Երկրի մարմնավորումը, աստվածների նախամայրը:

ԴԱՓՆԵ– Գետերի աստված Պենևսի դուստրը:

ԴԵԼՈՍ–Կղզի Էգեյան ծովում, Ապոլլոնի և Արտեմիսի ծննդավայրը, որը հայտնի էր Ապոլլոնին նվիրված սրբավայրով:

ԴԻՈՆԻՍՈՍ–Չևսի ու Սեմելեի որդին, խաղողագործության և գինու աստվածը:

ԴԻՈՍ–Չևսի մյուս անունը:

ԴԻՔԵՐ–Դիցաբանական աստվածներ:

ԵՐԿՐԱՍԱՍԱՆ–Պոսեյդոնի մակդիրն է:

ՉԵՎԱ–Քրոնոսի որդին, հունական դիցարանի գերագույն աստվածը, աստվածների հայրն ու տիրակալը:

ԷՈՍ–Արշալույսի աստվածություն:

ԷՊԱՓՈՍ–Չևսի և Իոյի որդին:



ԷՐՈՍ–Սիրո աստվածը:

ԷԶՈ–Արձագանքի հավերժահարսը, այստեղից էլ՝  
ռուսերեն ջօօ (արձագանք) բառը:

ԼԻԴԻԱ–Պետություն Փոքր Ասիայում, որը ջախ-  
ջախվել է պարսիկների կողմից մ. թ. ա. VI դա-  
րում:

ԿԱՌԱՓՆԱԾԻՆ–Աթենաս-Պալլասի մակդիրն է:  
Այսպես էին անվանում, քանզի դիցուիին ծնվել  
էր աստվածահոր՝ Չևսի կառափից:

ԿԵՆՏԱՎՐՈՍ–Ձիու և մարդու մարմնով առասպե-  
լական արարած, ինչպես նաև՝ երկնականարի  
հարավային կիսագնդի մեծ համաստեղություն-  
ներից մեկը:

ԿԻԹԵՐԱ–Կղզի, որի մոտ ծնվել է Աֆրոդիտեն:

ԿԻԹԵՐՈՆ–Լեռնաշղթա Բեովտիայի և Ատտիկա-  
յի սահմանին:

ԿԻԹԵՐՈՒՀԻ–Աֆրոդիտեի մակդիրներից է:

ԿԻՊՐՈՍԱԾԻՆ–Աֆրոդիտեի մակդիրներից է:

ԿԻՊՐՈՒՀԻ–Աֆրոդիտեի մակդիրներից մեկը: Ըստ  
ավանդության, նա ծնվել է ծովի ճերմակ փր-  
փուրներից և ափ ելել Կիպրոս կղզում:

ԿԼԻՄԵՆԵ–Ծովային աստվածուհի Թետիսի դուստ-  
րը:

ՀԱԴԵՍ–Մեռյալների ստորերկրյա թագավորության  
դժնատեսիլ աստվածը, Չևսի եղբայրը:

ՀԵԼԻԱԴՆԵՐ–Հելիոսի զավակները:

ՀԵԼԻԿՈՆ–Լեռ Բեովտիայի հարավ-արևմուտքում:

ՀԵԼԻՈՍ–Արևի աստվածը:

ՀԵԼԼԱԴԱ–Նույնն է՝ Հունաստան:

ՀԵՐԱ– Գերագույն աստվածուհին, Չևսի քույրն ու կինը:

ՀԵՐՄԵՍ–Աստվածների բանբերն ու մեռածների հոգիների ուղեկիցը դեպի Հադեսի ստորերկրյա թագավորություն: Եղել է ճանապարհորդների, առևտրի, հնարագիտության, խաբեության, մինչև անգամ՝ գողության հովանավոր աստվածը: Այնուհետև նույնացվել է գիտության ու կախարդության եգիպտական Տոտ աստծո հետ՝ դառնալով նաև կախարդության և աստղագուշակության աստվածը:

ՀԵՓԵՍՏՈՍ–Չևսի և Հերայի որդին, կրակի ու դարբնության աստվածը:

ՄՈՅՐԱՆԵՐ–Այսպես էին անվանում ճակատագրի դիցուհիներին (Կլոթո, Լաբեսիս և Ատրոպոս), ովքեր բնակվում էին Օլիմպոսում՝ տնօրինելով մահկանացուների ու աստվածների ճակատագիրը:

ՄՈՒՍԱՆԵՐ–Չևսի և Մենմոսիների դուստրերը, գիտության ու արվեստի հովանավոր ինը դիցուհիները, ովքեր մշտապես ուղեկցում էին Ապոլլոնին:

ՆԱՐՑԻՍ– Գետերի աստված Կեփիսոսի և հավերժահարս Լավրիոնեի որդին:

ՆԵԿՏԱՐ–Աստվածների ընպելիք, որը պարզևում էր անմահություն և հավիտենական երիտասարդություն:

ՆԻՄՖԱՆԵՐ–Բնության տարբեր երևույթները մարմնավորող աստվածուհիներ:

ՇԱՆԹԱՌԱՔ–Չևսի մակդիրներից է:

ՇԱՆԹԱՐՁԱԿ–Չևսի մակդիրներից է:

ՊԱԿՏՈԼՈՍ– Գետ Լիդիայում:

ՊԱՆ–Անտառների աստվածը, հովիվների, հոտերի ու նախիրների պահապանը, բնության հովանավորը: Նա մարդկանց ահ ու սարսափ էր ներշնչում: Այստեղից էլ ծնունդ են առել панический страх, паника, паникер արտահայտությունն ու բառերը:

ՊԱՌՆԱՍ–Լեռ Հունաստանի Փոկիս մարզում:

ՊԱՏՄՈՍ–Հունական կղզի Էգեյան ծովի հարավ-արևելքում:

ՊԵԱՆ–Այդպես էին կոչվում Ապոլլոնին (երբեմն էլ՝ այլ աստվածներին) ձոնվող հանդիսավոր երգերը:

ՊԵՆԵՎՍ– Գետերի աստված:

ՊԻԹՅԱՆ–Ապոլլոնն սպանել էր Պիթո տեղանքում իշխող Պիթոնն օձին և ստացել այս մականունը:

ՊՈՍԵՅԴՈՆ–Ծովերի տիրակալ աստվածը, Չևսի եղբայրը:

ՍԵԼԵՆԵ–Լուսնի աստվածություն:

ՍՏԻՔՍ–Համաձայն հունական դիցարանի, մեռյալ-

ների ստորերկրյա թագավորությունը շրջապատող գետ, որի ջրերով տրված երդումը սրբազան ու անդրժեղի էր համարվում մարդկանց և աստվածների համար:

**ՎԱՀԱՆԱԿԻՐ**–Չևսի մակդիրներից է:

**ՏՄՈԼՈՍ**–Լեռ Լիդիայում:

**ՓՐՓՐԱԾԻՆ**–Աֆրոդիտեի մակդիրներից է:

**ՔԱՈՍ**–Հին հույների պատկերացմամբ, ամենից առաջ գոյություն է ունեցել միայն մշտնջենական մթին Քաոսը, որից էլ ծնվել են աշխարհն ու աստվածները:

**ՔԱՐԻՄՆԵՐ**– Գեղեցկության, հրապուրանքի և նրբագեղության աստվածուհիները:

**ՔՐՈՆՈՍԱԾԻՆ**–Չևսի մականունն է: Այդպես էին անվանում, քանի որ նա Քրոնոսի որդին էր:

**ՕԼԻՄՊՈՍ**–Հելլենական աստվածների նստավայրն ու սրբազան լեռը:

**ՕՎԿԻԱՆՈՍ**–Ուրանոսի և Գեայի որդին:

**ՕՐԵԱԴՆԵՐ**–Լեռնային հավերժահարսեր:

**ՖԱԵՏՈՆ**–Արևի աստծո՝ Հելիոսի որդին:

**ՖԱՎՆ**–Այծամարդ, սատիր:



# ԲՈՎԱՆԴԱԿՈՒԹՅՈՒՆ

<b>Հեղինակի ստեղծագործական ուղին.....</b>	<b>4</b>
<b>Հելլենական լեզենդներ.....</b>	<b>8</b>
Դափնե.....	9
Նարցիս.....	16
Սիրինգս.....	23
Ակտեոն.....	29
Արաքնե.....	35
Ադոնիս.....	41
Ֆաետոն.....	47
<b>Առակներ և լեզենդներ.....</b>	<b>57</b>
Բժիշկ գորտը.....	58
Պարծենկոտ բզեզը.....	60
Երջանկությունը.....	63
Ջեսն ու կրիան.....	65
Մոծակն ու եզր.....	67
Խարդախ փիսոն.....	69
Կատուն՝ քահանա.....	70
Ուղտն ու եզր.....	71
Աղվեսն ու կռունկը.....	72
Ազրավն ու աղվեսը.....	74
Աղվեսն ու այծը.....	76
Մեծամիտ կանթեղը.....	79
Առյուծը, աղվեսն ու էշը.....	81
Մեծամիտ էշը.....	85
Ագահ մրջյունը.....	87

Կրիան ու արծիվը.....	88
Անխելք լուսինը.....	89
Ծերունին և մահը.....	90
Իշուկն ու գայլը.....	92
Անբախտ ավանակը.....	94
Կուրամուկը.....	96
Էշն ու առյուծը.....	97
Աստղագուշակը.....	100
Աքաղաղն ու գողը.....	101
Անճոռնի ճայակը.....	103
Մոծակն ու առյուծը.....	105
Մկնիկները.....	107
Որսորդները.....	109
Ժլատ մեղուները.....	111
Պոչատ աղվեսը.....	113
Պարծենկոտ ջորին.....	115
Արևն ու քամին.....	117
Եղեգն ու կաղնին.....	119
Ապաշխարող գայլը.....	121
Այրի կինն ու հավը.....	122
Հնարամիտ մարդը.....	123

**Քառյակներ..... 125**

«Սա՛ էլ կանցնի, մի՛ վշտացիր...».....	127
«Եթե տաճար պիտի մտնես...».....	127
«Թե Աստված կա, որտե՞ղ է Նա...».....	127
«Ասում են, թե մարդու աչքը...».....	128
«Հոգին մարդու էութունն է...».....	128
«Հողը ինչքան տրորվում է...».....	128
«Տիեզերքի գաղտնիքները...».....	129

«Արդարությունն ու պատիժը...».....	129
«Թե շարունակ մենախոսես...» .....	129
«Առանց փշի վարդ չի լինում...» .....	130
«Էջի քացուց չեն նեղանա...».....	130
«Ամեն փորձանք՝ մի-մի հորդոր...» .....	130
«Պարտություններն ու հաղթանակ...» .....	131
«Մարդ չի կարող երբեք գործել...» .....	131
«Լոտոս ծաղկի թերթիկի պես...» .....	131
«Ես հինդու եմ, դու՝ քրիստոնյա...».....	132
«Հենց փչում է շունչը վերջին...».....	132
«Հնուց եկած մայր-գրքերը...».....	132
«Երագում ինձ սպանեցին...».....	133
«Ամեն կրոն ծնունդ ունի...» .....	133
«Չունեցածի համար երբեք...».....	133
«Ասում են, թե նյութ-աշխարհը...» .....	134
«Հավերժի դեմ, հավերժի մոտ...».....	134
«Հերիք չեղա՞վ՝ կրոնները...».....	134
«Երջանկություն, պատիվ ու փառք...» .....	135
«Մե՛կ Աստված կա, մե՛կ Արարիչ...» .....	135
«Մեր կարճ խելքով, խավար մտքով...».....	135
«Կյանքը խաղ է, վերջը մահ է...» .....	136
«Առանց Տիրոջ թույլտվության...».....	136
«Արարիչը հստակ գիտի...».....	136
«Հզորի դեմ մենք անզոր ենք...».....	137
«Տարածություն և ժամանակ...» .....	137

**Հանելուկներ**..... 138


**Պատասխաններ**..... 150

**Ծանոթագրություններ** ..... 151

# ՆԱՐԻՆԵ ՄԿՐՏՈՒՄՅԱՆ

ԷԼ. ՓՈՍՏ՝ [narinemkrtumyan@rambler.ru](mailto:narinemkrtumyan@rambler.ru)

## ԵՐԿԵՐ



ԳԵՂԱՐՎԵՍՏԱԿԱՆ  
ԽՄԲԱԳԻՐ ԵՎ ՍՐԲԱԳՐԻՉ՝  
ԿԱՐԻՆԵ ՄԿՐՏՈՒՄՅԱՆ  
ՄՈՒՏՔԱԳՐՈՂ ԵՎ  
ՀԱՄԱԿԱՐԳՉԱՅԻՆ ՉԵՎԱՎՈՐՈՂ՝  
ՆԱՐԻՆԵ ՄԿՐՏՈՒՄՅԱՆ